

四庫全書

史部

欽定四庫全書

史部

御批資治通鑑綱目卷三十七上

詳校官修撰臣錢棨

編修臣程嘉謨覆勘

總校官降調編修臣倉聖脈

校對官中書臣宋枋遠

謄錄監生臣趙之聖

欽定四庫全書

御批資治通鑑綱目卷三十七上

起戊辰隋煬帝大業
四年○蓋戊寅七月
凡十年有奇

四年春正月開永濟渠

發河北諸軍百餘萬衆穿永濟渠引沁水
南達于河北通承郡丁男不供始後婦人
集覽 沁水在懷

州北源出上黨羊頭山或曰沁水出井陘東山海經
云謁戾之山沁水出焉今澤州有沁水縣因水名之

質實 一統志云永濟渠在東昌府館陶縣西二里漢
名屯氏河隋疏為水濟渠亦曰御河源自衛輝

府輝縣東北流至臨清與會通河合流入于海沁水
源出沁州沁源縣綿山穿太行達濟源經武陟入黃

河元郭守敬言沁河雖澆灌猶有漏堰引其餘水東流至武陟縣北合流入于御河灌田二千餘頃河北黃河之北注見晉安帝義熙十三年涿郡注見漢帝立更始二年

以元壽為內史令○二月西突厥入貢

裴矩聞西突厥處羅可汗思其母請遣使招懷之帝遣謁者崔君庸齎詔諭之處羅甚踞受詔不肯起君庸謂之曰突厥中分為二每歲交兵積數十歲莫能相滅今啓民舉其部落卑躬折節入臣天子欲借兵大國共滅可汗天子許之師出有日矣願可汗母向夫人懼西國之滅旦夕守闕哭泣哀祈匍匐謝罪請發使召可汗令入內屬天子憐之故復遣使至此今可汗乃踞慢如是則夫人為誑天子必伏尸都市傳首虜庭發大隋之兵資東國之衆左提右挈以擊可汗亡無日矣奈何愛兩拜之禮絕慈母之命惜一語

稱臣使社稷為墟乎處羅叟然而起流涕再拜跪受詔書因遣使者隨君肅貢汗血馬

集覽

守闕

守去聲詣也叟然叟質實謁者注見漢高后三年折厥縛反左右驚顧貌

質實

節注見周赧王元年匍匐

注見齊主寶卷永元元年扶匍社稷注見新莽天鳳元年汗血馬注見漢武帝元鼎二年

三月倭國入貢

倭王遺帝書曰日出處天子致書日沒處天子無恙帝覽之不悅詔鴻臚蠻夷書無禮者勿奏

集覽

倭注見唐高宗國龍朔二年

質實

鴻臚官名注見漢武帝太初元年

帝如五原遂巡長城

行宮設六合板城載以槍車每頓舍則外其轅以為外闌內布鐵菱次施弩牀以繩連機人來觸繩則弩

機旋轉向
所觸而發
質實
五原郡名注見漢
宣帝甘露二年

夏四月營汾陽宮

帝無日不治宮室兩京及江都苑囿雖多久而益
質
厭乃備責天下山川之圖以求勝地因營是宮

質

汾陽宮注見大業十三年江都
縣名注見漢獻帝興平元年

齊王長史柳謩之有罪除名

初元德太子卒齊王暕次當為嗣元德吏兵二萬餘
人悉隸於暕帝為之妙選僚屬以柳謩之為長史且
戒之曰齊王德業修備富貴自鍾卿門若有不善罪
亦相及暕寵遇日隆驕恣不法昵近小人樂平公主
嘗言柳氏女美帝久未答主以進暕帝復問之不
悅暕從幸汾陽宮大獵大獲麋鹿以獻而帝未有得

也乃怒從官皆言為暎左右所逼帝於是發怒求暎
罪時制縣令無故不得出境暎幸伊闕令皇甫翊携
之至宮御史常德裕希旨劾之帝令甲士大索暎第
因窮治其事暎妃帝氏早卒暎與妃姊元氏婦通召
相工遍視後庭相工指妃姊言當為皇后暎以元德
太子有三子恐不得立陰挾左道為厭勝至是皆發
帝大怒斬暎左右數人賜妃姊死王府僚皆斥邊遠
嘗之亦坐除名時趙王杲尚幼帝謂侍臣曰朕惟有
暎一子不然者當肆之市朝以明國憲暎自是恩寵
日衰不復預政帝恒令虎賁即將一人監其府事所
給左右皆以老
集覽虎賁即將注見
弱備員而已
新莽地皇二年
質實樂平縣名
帝元嘉十三年伊闕山名注見周威烈王十五年左
道注見漢成帝永始二年厭勝注見宋明帝泰始四
年肆之市朝周禮注有罪既殺陳其尸曰肆市朝不
過連言之左傳晉殺三郤尸諸朝殺董安于尸諸市

賤者在市也又大夫以上於朝士以下於市趙國名注見漢景帝三年

書法

驕恣不法昵近小人齊王之罪也罪謫之何齊王之罪長史之罪也綱目書曰有罪除名

其為臣下不匡之戒深切矣

置城造屋於萬壽戍以處突厥啓民可汗質實

可汗注見漢後

主景耀四年

書法

特筆也書處降多矣未有善置城造屋者書置城造屋譏敵內也辭繁弗殺綱目之意見

矣

○秋七月復築長城

發丁男二十餘萬
築之自榆谷而東
質實
一統志云長城在臨洮府城
北史記秦始皇遣蒙恬發兵

三十萬北築長城萬里起自臨洮
此處榆谷注見漢章帝章和元年
印

書法
隋於是凡四書矣故書復復也者不已之辭
也終綱目書築長城十拜秦始皇三十二年

隋居四馬用民如此欲不亡
得乎舍是無書築城者矣

裴矩以鐵勒擊吐谷渾大破之

裴矩說鐵勒使擊吐谷渾大破之吐谷渾可汗伏允
遣使求救帝遣安德王雄許公宇文述迎之吐谷渾
畏隋兵盛不敢降帥衆西遁追之拔曼頭赤水二
城獲其王公以下二百人伏允南奔雪山其地東西
四千里南北二千里皆置郡
質實
鐵勒高車部號注
見宋文帝元嘉七

年吐谷渾西域國名注見晉元帝建武元年安德郡
名注見陳宣帝太建八年許縣名注見漢光武建武
年八

書法

帝雲起以突厥兵書遣大業元年此不書
遣何矩專也自矩開邊中國罷敝以至於亡

直書裴矩以
鐵勒罪之也

九月徵天下鷹師

至者萬
餘人

冬十月赤土入貢

赤土南海中遠國也帝遣使齎詔賜之泛海百餘日
入境月餘乃至其都其王居處器用窮極珍麗遣子

入貢質寶赤土國名
未詳沿革

遣將軍薛世雄擊伊吾降之質寶

伊吾郡名注見漢明帝永平十五年

己巳五年春正月改東京為東都○詔均天下田○禁民

間兵器

鐵义搭鈎積刃之類皆禁之 集覽積刃積祖管反鉞也鉞音蟬小稍也

三月帝巡河右夏四月遣兵擊吐谷渾不克西域諸國
來朝獻地置西海等郡

三月西巡河右四月出臨津關陳兵講武將擊吐谷渾五月至浩亶川吐谷渾可汗伏允帥眾保覆袁川

帝分命內史元壽等圍之伏允遁去遣其名王詐稱
伏允保車我真山詔大將軍張定和光祿大夫梁默
等追討皆為所殺獨衛尉卿劉權出伊吾至青海虜
獲千餘口追奔至伏侯城而還初帝嘗謂給事郎蔡
徵曰自古天子有巡狩之禮而江東諸帝多傅脂粉
坐深宮不與百姓相見此何理也及將西巡命裴矩
說高昌王麴伯雅及伊吾吐屯設等啗以厚利召使
入朝至是至燕支山伯雅吐屯設等及西域二十七
國謁於道左帝復令武威張掖士女盛飾縱觀以示
中國之盛車服不鮮者郡縣督課之吐屯設獻地數
千里帝大悅置西海河源鄯善且末等郡謫天下罪
人為戍卒以守之命劉權鎮河源郡積石鎮大開屯
田扞禦吐谷渾以通西域之路進裴矩銀青光祿大
夫是時天下凡有郡一百九十縣一千二百五十五
戶八百九十萬有奇東西九千三百里南北萬四千
八百一十五里隋氏之盛極於此矣自西京及西北

諸郡皆轉輸塞外歲鉅億計或遇寇鈔死亡不達郡縣皆徵破其家由是百姓失業西方先困矣初伏允使其子順來朝帝留不遣至是伏允敗

集覽

浩壘注

走帝立順為可汗遣之不果入而還

帝神爵元年吐屯設突厥大臣凡二十八等其一曰吐屯其俗謂別部典兵者曰設時西突厥強盛西域諸胡皆臣之突厥各遣吐屯監之督其征賦故伊吾國有吐屯設燕支山伊吾國中地漢時匈奴中馬支山也燕馬并音烟馬支山注見漢武帝元狩二年且末注見宋文帝元嘉十八年

質寶

臨津關未

詳處所青海縣名注見唐高宗鳳儀三年武威西域國名注見齊明帝建武四年巡狩晏子曰天子適諸侯曰巡狩巡狩者巡所守也注巡所守者巡行諸侯所守之土也又曰巡所守者自上察下也西域國名注見漢宣帝神爵二年武威郡名注見漢光武建武十年張掖郡名注見晉安帝隆安元年西海郡名注

見漢和帝永元十四年河源郡名未詳處所鄯善郡
 名注見漢武帝元鼎三年積石鎮注見唐太宗貞觀
 九年銀青光祿大夫從三品之官
 名冠鈔注見漢光武建武十五年

冬十一月還東都

車駕東還行經大斗拔谷山路隘險風雪晦冥文武
 饑餒沾濕士卒凍死者大半後宮妃主或狼狽相失
 與軍士雜
 宿山間 質實 大斗拔谷注見唐玄宗天寶六
 載狼狽注見漢獻帝初平三年

以裴蘊為御史大夫

民部侍郎裴蘊以民間版籍多脫漏戶口詐注老小
 奏令貌閱若一人不實則官司解職又許民糾得一
 丁者令被糾之家代輸賦役是歲進丁二十四萬口
 六十四萬帝謂百官曰前代無賢才致此罔冒今戶

口皆實全由裴蘊權授御史大夫與裴矩虞世基參掌機密蘊善候伺人主微意所欲罪者則鍛成其罪所欲宥者則附從輕典是後大小之獄皆以付蘊輕重皆由其口人不能詰

質實

裴蘊河東聞喜人

突厥啓民可汗死立其子咄吉為始畢可汗質實

突厥

國名注見梁武帝大同十一年

始畢表請尚公主詔從其俗

殺司隸大夫薛道衡

道衡以才學有盛名自潘州刺史召還上高祖頌帝不悅曰此魚藻之義也拜司隸大夫將罪之司隸刺

史房彥謙勸以杜絕賓客卑辭下氣道衡不能用會
議新令久不決道衡謂人曰向使高頰不死令決當
久有人奏之帝怒付執法者推之裴蘊奏道衡負才
悖逆有無君之心縊殺之妻子徙且末天下寃之

集覽

魚藻之義詩魚藻刺幽王也言萬物失其性故
君子思古之武王馬注魚以依蒲藻為得其性

今王政教衰羣生不得其所故思古之武王也
今煬帝謂薛道衡之頌高祖是亦思武王之義 **質實**

潘州未詳沿革司隸官名
注見漢元帝永光元年

唐
六年春正月盜入建國門

有盜數十人素冠練衣焚香持華自稱彌勒佛入建
國門奪衛士仗將為亂齊王暉遇而斬之於是都下
大索連坐者十餘家

諸蕃來朝陳百戲於端門以示之

帝以諸蕃酋長畢集洛陽陳百戲於端門街執絲竹者萬八千人自昏達旦終月而罷所費鉅萬自是歲以為常諸蕃請入豐都市交易許之先命整飾店肆盛設帷帳珍貨充積人物華盛胡客過酒食店悉令邀入醉飽而散不取其直給之曰中國豐饒酒食例不取直胡客皆驚歎其黠者頗覺之見以繒帛纏樹曰中國亦有貧者衣不蓋形何如以此物與之纏樹何為市人慙不能荅帝稱裴矩之能謂群臣曰裴矩大識朕意凡所陳奏皆朕之成筭而未發者自非奉國盡心孰能若是是時矩及大將軍宇文述內史侍郎虞世基御史大夫裴蘊光祿大夫郭衍皆以諂諛有寵述容止便辟侍衛者咸取則焉衍嘗勸帝五日一視朝曰無效高祖空自勤苦為也帝臨朝凝重發言可觀而內存聲色日於苑內林亭盛陳酒饌救燕

王侯與梁公蕭鉅于牛左右宇文晶及高祖嬪御為
 一席僧尼道士女官為一席帝與諸寵姬為一席畧
 相連接酒酣殺亂靡所不至楊氏婦女之美者往往
 進御晶出入不限門禁妃嬪公主皆有醜聲帝亦不
 之罪

集覽

百戲音樂志有魚龍爛漫俳優侏儒山車
 巨象拔井種瓜殺馬剝驢等奇怪異端百

有餘物名為百戲十牛左右官名也又千牛注見大
 業十三年晶胡了反道士大霄琅書經曰士者何理
 也從道為事故稱道士女官
 官或作冠謂女為道家者流
 質實苜長注見新莽始
 建國二年苜蒙洛
 陽縣名注見周顯王三年燕國名注見唐高祖武德
 四年幽州梁郡名注見漢後主延熙十八年宋國

書法

凡書戲譏也以
 示諸蕃深譏也

遣兵攻流求殺其王虜其眾以歸

帝遣使招撫流求不從遣虎賁郎將陳稜發
兵泛海擊之斬其王遏刺兜虜其民以還
質實統

志云流求國名古未詳何國漢魏以來不通中華隋
大業中令羽騎尉朱寬訪求異俗始至其國語言不
通掠一人以返後遣虎賁郎將陳稜率兵至其都虜
男女五千人還唐宋時未嘗朝貢元遣使招諭之竟
不從至本朝洪武中其國分為三曰中山王曰山南
王曰山北王皆遣使朝貢永樂初其國王嗣立皆祇
受朝廷冊封自後惟中山王來朝至今
不絕其山南山北二王蓋為所併云

詔自今非有功者不賜爵

詔以近世茅土妄假名實相乖自今惟有功勳乃得
賜封仍令子孫承襲於是舊賜五等爵非有功者皆
除集覽茅土注見漢昭烈帝章武二年

以散樂配太常

以所徵散樂悉配太常皆置博士弟子以相傳授樂工至三萬餘人

三月帝如江都○除榆林太守張衡名以王世充領江

都宮監

初帝營汾陽宮令張衡具圖奏之衡進諫曰比年勞役繁多百姓疲弊願稍加抑損帝意不平謂侍臣曰張衡自謂由其計畫令我天下也乃錄前幸涿郡父老謁見衣冠不整衡為憲司不能舉正之罪出為榆林太守久之敕督役江都宮禮部尚書楊玄感素之子也使至江都衡謂之曰薛道衡真為枉死玄感奏之江都郡丞王世充又奏衡頻減頓具帝怒將斬之乃得釋除名為民以世充領江都宮監世充本

西域胡人姓支氏父叔幼從母嫁王氏因冒其姓世
充性譎詐有口辯頗通書傳好兵法習律令帝數幸
江都世克能伺候顏色雕飾
池臺奏獻珍物由是有寵
集覽 類具頓舍 質實 楊
與供具 立

感華陰人榆林郡名注見
文帝開皇十九年夏勝

冬十二月文安侯牛弘卒

弘寬厚恭儉學術精博隋室舊臣始終信任悔吝不
及者一人而已弟弼醢酒射殺弘駕車牛弘自外還
其妻迎謂之曰叔射殺牛弘無所問直云作脯坐
定其妻又言弘曰已知之矣顏色自若讀書不輟質
實一統志云文安漢之縣名屬渤海郡東漢屬河間
國後屬瀛州晉屬章武國後魏屬瀛州隋屬河間
郡唐廢豐利縣移文安縣於其城屬霸州宋省永
清縣入焉金元俱仍舊焉本朝因之改屬順天府

穿江南河

自京口至餘杭八百餘里
廣十餘丈欲東巡會稽也
質實京口郡名注見晉成

云餘杭秦之縣名屬會稽郡漢因之東漢屬吳郡三
國吳屬吳興郡晉因之隋初屬杭州後改餘杭縣唐

宋元俱仍舊馬本朝因之改屬杭州
府會稽縣名注見文帝開皇九年

詔百官戎服從駕

帝以百官從駕皆服袴褶於軍旅間不便詔皆戎衣
五品以上通著紫袍六品以下兼用緋綠胥吏以青
庶人以白屠高質實袴褶小衣名注見齊主寶卷永
以皂士卒以黃質實元元年軍旅注見梁武帝中大

年同二

書法

吉行戎服非事也亂始兆矣故謹書之

徵高麗王元入朝不至

帝之幸啓民帳也高麗使者在啓民所啓民不敢隱與之見帝裴矩說帝曰高麗漢晉皆為郡縣今乃不臣先帝欲征之久矣今其使者覲見啓民舉國從化可因其恐懼脅使入朝帝從之敕牛弘宣旨令使者還語高麗王入朝至是不至乃謀討之課天下富人買馬疋至十萬錢簡閱器仗或有濫惡使者立斬質寶高麗外夷國名注見漢武帝元封二年朝鮮

辛未七年春二月帝自將擊高麗夏四月至臨朔宮徵天

下兵會涿郡

欽定四庫全書

御批資治通鑑綱目

十一

於前船選補其受選者三十餘人或徒步隨船三千

餘里凍餒疲頓死者什一二遂下詔討高麗敕幽州總管元弘嗣往東萊海口造船三百艘官吏督役晝

夜立水中不敢息自腰以下皆生蛆死者什三四又

敕河南淮南江南造戎車五萬乘送高陽供載衣甲

幔幕令兵士自挽之發河南北民夫以供軍須江淮以南民夫及船運黎陽及洛口諸倉米舳舻千里往

還常數千萬人晝夜不質實幽州注見唐高祖武德絕死者相枕天下騷動四年元弘嗣河南人東

萊郡名注見漢安帝永和三年高陽縣名注見晉愍帝建興四年黎陽倉名注見陳後主至德元年一統志云洛口倉名在河南府鞏縣西隋煬帝

常聚粟於此舳舻注見晉帝奕太和四年書法高麗嘗書討矣文帝開皇十八年此其書擊何廣賊也師出無名故書自將不書討

發明

楊廣不道天醜其為亦既經畧西域臣服突厥破吐渾降伊吾攻殺流求等國矣好大不

止今又從事遼東迄至羣盜蜂起而國遂以亡蓋廣之用心必欲使際天所覆舉歸封畧之內豈知末年反無容足之所身死不保至徹床箒以斂其屍自古佳兵事外者未有不受其禍然罕有如廣之甚者綱目於此書帝自將擊高麗而不書帝親征高麗則見高麗無罪之可征而他日用兵敗亡之咎亦不可委之他人此固書法之意也

山東河南大水質實

山東注見宋文帝元嘉二十五年河南注見宋主昱元徽元年

漂沒三十餘郡

冬十月底柱崩質實

底柱山名注見漢成帝綏和二年

偃河逆流
數十里

西突厥酋長射匱逐處羅可汗處羅來朝

初帝西巡遣使召西突厥處羅可汗令與車駕會大斗拔谷不至帝大怒會其酋長射匱遣使求婚裴矩因奏曰處羅不朝恃疆大耳臣請以計弱之分裂其國即易制也射匱者達頭之孫世為可汗今以失職附屬處羅若厚其禮拜以為大可汗則突厥勢分矣帝然之因召其使者諭之令誅處羅然後為婚射匱大喜興兵襲處羅處羅大敗將數千騎東走高昌帝遣裴矩與向氏馳至玉門關諭處羅入朝十二月至臨朔宮帝大悅接以殊禮處羅終有怏怏之色

集覽 達頭可汗之號也名玷厥

質實 玉門關注

見漢武帝元鼎二年怏怏
注見漢光武建武二年

王薄張金稱高士達竇建德等兵起

帝自去歲誅討高麗詔山東置府令養馬以供軍役
又發民夫運米塞下車牛往者皆不返士卒死亡過
半耕稼失時穀價踴貴東北邊尤甚斗米直數百錢
所運米或粗惡令民糴以償之又發鹿車夫六十餘
萬二人供推米三石道途險遠不足充餽糧至鎮無
可輸皆懼罪亡命重以官吏侵漁百姓窮困於是始
相聚為羣盜鄒平民王薄擁衆據長白山剽掠齊濟
之郊自稱知世即言事可知矣又作無向遼東浪死
歌以相感勸避征役者多往歸之平原東有豆子航
負海帶河地形深阻羣盜多匿其中有劉霸道者家
於其旁喜俠食客常數百人遠近多往依之有衆十
餘萬號阿勇賊漳南人竇建德少尚氣俠膽力過人
會募人征高麗建德以選為二百人長同縣孫安祖
亦以驍勇選為征士安祖辭以家為水漂妻子餒死

縣令怒笞之安祖殺令亡抵建德建德謂曰文皇帝時天下殷甚發百萬之衆以伐高麗尚為所敗今水潦為灾百姓困窮加之往歲西征行者不歸瘡痍未復主上不恤乃更發兵親擊高麗天下必大亂丈夫不死當立大功豈可但為亡虜邪乃集無賴少年得數百人使安祖將之入高鷄泊中為羣盜時郃人張金稱聚衆河曲衛人高士達聚衆於清河郡縣疑建德與賊通悉收其家屬殺之建德帥麾下二百人亡歸士達士達自稱東海公以建德為司兵頃之安祖為金稱所殺其衆盡歸建德建德兵至萬餘人建德能傾身接物與士卒均勞逸由是人爭附之為之致死自是所在羣盜蜂起不可勝數徒衆多者至萬餘人攻陷城邑救都尉鷹揚與郡縣追捕然莫能禁

集覽 豆于酃地名在平原屬濟寧酃音各黨反喜俠喜去聲說文悅也悅為任俠也任俠注見漢武帝元朔二年阿勇賊之號郃人

郿縣人也索隱曰郿音輸漢屬清河郡今屬貝州河
曲戰國秦伐晉戰於河曲杜預曰在河東蒲阪縣南
今隕州河曲縣舊人舊縣人也周亞夫封條侯徐廣
曰漢功臣侯表作舊字董衝音他彫反漢地志條縣
屬勃海唐屬冀州括地志云故舊城俗名南條城在
德州舊縣南索隱曰條或作條一作修渤海有修市
縣服虔曰舊條修條並音條今景州舊縣清河漢清
河郡唐改為貝州今恩州是都尉鷹揚都尉及鷹揚
府

正誤

阿勇今
按闕

質實

鹿車小車也言車窄狹纒容一
鹿故曰鹿車餽糧詩乃裹餽糧

注餽糧乾糧也郿平縣名注見宋明帝泰始三年一
統志云長白山在濟南府長山縣西南三十里山跨
郿平縣西南一十里又名會仙山山有峯孤秀盤鬱
獨壘衆山抱朴子長白乃泰山之副嶽繡江源發於
此山高一千九百丈周六十里雲雨長白故名上有
醴泉寺即范仲淹讀書處齊濟二州名齊注見漢景

帝三年濟南濟注見晉帝奕太和元年高平遠東郡
名注見秦王政三年平原縣名注見漢光武建武五
年漳南縣名注見秦二世三年高鷄泊未詳處所郚
漢之縣名屬清河郡晉因之北齊省入平原縣隋復
置貝州治郚縣唐改為夏津縣宋屬魏州金屬大名
府元屬高唐州入本朝因之改屬東昌府阿曲漢之
縣名屬太原郡晉為嵐州雄勇鎮宋立火山軍屬代
州後置火山縣尋廢金改為火山州後改曰隰州貞
元初增置河曲縣取河千里一曲之義元至元初州
縣俱省入保德州至本朝復為河曲縣改屬太原府
舊古地名漢為條縣晉因之隋改條為蔣唐屬德州
又改屬冀州元初陞為元州尋復為縣本朝初省入
景州故城在河間府景州城內山東地名注見宋文
帝元嘉二十五年清河縣名注見秦王政十四年東
海郡名注見秦二世二年却廙下注見晉
愍帝建興三年蜂起注見秦二世二年

書法

書兵起何賊廣也自是凡起兵革書擊不書討書殺不書誅

發明

甚矣三代而下生民之不幸也桀為不道有成湯則塗炭可脫紂為不道有武王則毒痛

可免自秦人郡縣天下雖上有桀紂之暴而下無湯武之興必至賊盜蜂起天下大亂屠滅幾盡而後已故夫胡亥新莽桓靈隋煬皆後世之所謂桀紂無有能正之者必待勝廣赤眉黃巾王薄張金稱之徒兵戈四起而後其國始墟此則世變之下生靈之不幸耳若夫王薄張金稱等皆當時群盜而不以盜書者亦以楊廣負天下之大逆故皆書起兵以正其罪此則綱目急於討賊之意耳予簿所以誅廣也其旨嚴矣

壬申八年春正月分西突厥為三部

帝分西突厥為三使處羅之弟闕達度設將羸弱萬餘口居會寧特救大柰別將餘眾居樓煩處羅將五百騎常從巡幸賜

質實

一統志云會寧後魏縣名屬隴西郡西魏置會州尋廢後

周併廢縣隋初置會寧縣屬平涼郡唐於縣置西會州後改為會寧郡又改會州金時陷於西河僑治會州城名新會州又陞西寧縣為州金廢元復置西寧縣為會州徙治於此尋省縣入州至本朝改為會寧縣屬鞏昌府樓煩縣名注見周赧王八年

道士潘誕伏誅

誕自言三百歲為帝合煉金丹帝為之作嵩陽觀所費巨萬誕云金丹應用石膽石髓發工鑿石深百尺者數十處不得乃言若得童男女膽髓各三斛六斗可以代之帝怒鎖詣涿郡斬之

質實

涿郡注見

漢帝立更
始二年

書法

廣殺人多矣未有書伏誅者此其書伏誅何重罪誕也誕合金丹法用石膽石髓鑿求不

得請以童男女膽髓各三斛六斗代之欺罔至此其罪可勝誅哉故雖賊廣殺之綱目必以伏誅書也綱目抑左道於方士必以伏誅書終綱目方士書伏誅七新垣平李少翁樂大潘誕柳泌趙歸真李玄伯

發明

煬殺人多矣未有得其罪者獨潘誕之死為得其辜此所以書其伏誅也

遣諸軍分道擊高麗

四方兵皆集涿郡帝徵合水令庾質問曰高麗之衆不能當我一郡今朕以此衆伐之卿以為克不對曰

伐之可克然陛下親行戰或未克懼損威靈若車駕
留此命猛將勁卒指授方畧倍道兼行出其不意克
之必矣事機在速緩則無功帝不聽尚方監耿詢上
書切諫帝大怒命左右斬之何稠苦救得免詔左十
二軍出鏤方樂浪等道右十二軍出黏蟬襄平等道
駱驛引途總集平壤凡一百一十三萬人其餽運者
倍之帝親授節度每軍大將亞將各一人騎兵四十
隊隊百人十隊為團步卒八十隊分為四團團各有
偏將一人其鎧冑纓拂旗旛每團異色受降使者一
人承詔慰撫不受大將節制其輜重散兵等亦為四
團使步卒挾之而行日遣一軍相去四十里連營漸
進御營六軍後發首尾亘千餘里近古出師之盛未
之有也

集覽 錢方縣名屬樂浪郡鏤龍珠反或音即豆
反樂浪注見漢武帝元封三年黏蟬縣名

屬樂浪服虔曰蟬音提襄平今遼東城是平壤高麗
所都也亦名長安括地志云平壤城本漢樂浪之王

險城即古朝鮮也

質實

一統志云合水古地名漢置郁郅縣於此屬北地郡東漢及晉皆廢後魏

後周皆為鎮隋於州城西南置合水縣屬慶州唐初改為合川縣貞觀初改曰弘化縣天寶初改安化至德初又改順化縣宋復為安化縣元省○奉朝初復置為慶陽府治所仍屬馬尚方監注見漢景帝後元年襄平縣名注見秦王政三年平壤城名在遼東行都司城東五百六十二里鴨綠江東北一名王險城即箕子之故國漢為樂浪郡治所晉義熙後其王高璉始居此城號為西京即古朝鮮國也陛下注見漢光武建武二十七年輜重注見周顯王三十六年六軍注見唐明宗長興三年

內史令元壽卒○三月左候衛大將軍段文振卒於師

文振嘗上表曰陛下寵待突厥太厚處之塞內資以兵食戎狄之性無親而貪異日必為國患宜以時諭

遣令出塞外然後明設烽候綠邊鎮防務令嚴重此
 萬歲之長策也兵曹郎斛斯政以器幹有寵帝使專
 掌兵事文振屢言政險薄不可委以機要不從及征
 高麗為左候衛大將軍出南蕪道道病上表曰陛下
 以遼東未服親降六師夷狄多詐深源防擬口陳降
 款毋宜遽受水潦方降不可淹遲惟願嚴勒諸軍星
 馳速發水陸俱前出其不意則平壤孤城勢必可拔
 如不時定脫遇秋霖兵糧必竭疆敵在前鞞鞞出後
 遲疑不決非上策也及卒帝甚惜之

集覽 斛斯虜複姓南蘇
 郡名在高麗中

質實 段文
 振北

海期原人壽玄孫烽侯注見齊高帝建元四
 年鞞鞞北狄種名注見晉成帝咸康六年

書法

具官何文振賢也與劉方異矣終綱
 目書卒於師八 許漢光武建武九年

諸軍渡遼水擊敗高麗兵遂圍遼東

師進至遼水高麗兵阻水拒守隋軍不得濟將軍麥鐵杖謂人曰丈夫性命自有所在豈能臥死兒女手中乎乃自請為前鋒帝命造浮橋於西岸未成趣東岸橋短不及岸丈餘高麗兵大至鐵杖躍而登岸與錢士雄孟乂等皆戰死何稠接橋二日而成諸軍繼進大戰高麗兵敗諸軍乘勝進圍遼東城即漢之襄平城也車駕渡遼引曷薩那可汗及高昌王伯雅觀戰處以懾憚之命尚書衛文昇撫其民給復十年建置郡

集覽

給復給賜與也復音福除也賜與除免其徭賦

質寶

遼水注見漢照烈帝章武

元年高昌郡名注見

齊明帝建武四年

夏五月納言楊達卒質寶

納言官名注見漢靈帝光和元年

○六月帝

至遼東攻城不克

諸將之東下也。帝親戒之曰：「今者弔民伐罪，非為功名。諸將或欲輕兵掩襲，孤軍獨闢，立一身之名，以邀勳名，非大軍行法。公等進軍，當分為三道，有所攻，擊必三道相知。凡軍事進止，皆須奏聞，待報至是，遼東嬰城固守。帝命諸軍攻之，又敕諸將高麗若降，即宜撫納，不得縱兵。城將陷，城中輒請降，諸將不敢赴先令馳奏。比報至，城中守禦亦備。隨出拒戰，如此再三。帝終不悟，既而城久不下。帝幸遼東城南台，諸將責之曰：「公今畏死，莫肯盡力，謂我不能殺公。」
耶因留止城，西高麗諸城各堅守不下。
質實 遼東
注見秦王政三年，掩襲應劭曰：「乘其不備而覆之。」曰：「掩不鳴金鼓而取之。」曰：「襲。」

將軍來護兒以水軍攻平壤敗績

護兒帥江淮水軍，舳舻數百里，浮海先進。入自溟水，去平壤六十里，與高麗相遇，進擊大破之。護兒欲棄

勝趣其城副總管周法尚止之請俟諸軍俱進護兒不聽直造城下高麗伏兵郭內出兵與戰而偽敗護兒逐之入城縱兵俘掠無部伍伏發大敗而還集覽高麗追至船所周法尚整陳待之高麗乃退涓水注見漢武帝元封二年伏兵郭質實舳艫津見內藏伏軍兵於羅郭之內空寺中晉帝奕太和四年周法尚汝南安南人吳次子

秋七月將軍宇文述等九軍大敗於薩水而還

將軍宇文述于仲文辛世雄衛文昇等九人分出諸道會於鴨綠水西兵自盧河懷遠二鎮人馬皆給百日糧又給衣資軍具火幕人別三石已上重莫能勝述令軍中遺棄米粟者斬士卒皆於幕下掘坑埋之纔及中路糧已將盡高麗遣大臣乙支文德詣其營詐降實欲觀虛實于仲文先奉密旨若高元及文德

來者必擒之至是仲文將執文德慰撫使劉士龍固止之遂聽其還既而悔之遣人召之不至述以糧盡欲還仲文議以精銳追文德述固止之仲文怒曰古之良將能成功者軍中之事決在一人今人各有心何以勝敵時帝以仲文有計畫令諸軍諮稟節度由是述等不得已而從之與諸將度水追文德文德見述軍士有饑色故欲疲之每戰輒走述一日之中七戰皆捷遂濟薩水去平壤城三十里因山為營文德復遣使詐降於述曰若旋師者當奉高元朝行在所述見士卒疲弊不可復戰又平壤險固度難猝拔遂還至薩水軍半濟高麗自後擊之辛世雄戰死諸軍俱潰將士奔還一日夜至鴨綠水行四百五十里王仁恭為殿擊高麗卻之來護兒亦引兵還唯衛文昇一軍獨全初九軍度遼凡三十萬五千人及還至遼東唯二千七百人資械蕩盡帝大怒鎖繫述等而還是行也唯於遼水西拔高麗武厲邏置遼東郡及通

定鎮而己集覽鴨綠水高麗馬訾水出靺鞨之白山其色如鴨頭之綠因名馬高元高麗王名元行

在所注見漢武帝天漢二年質實于仲文代人謹之孫一統志云鴨綠水在遼東都司城東五百

六十里按唐書東夷列傳有馬訾水出靺鞨之長白山色若鴨頭故名鴨綠西南流至安市入海唐太宗征高麗耀兵於鴨綠水即此瀘河懷遠二鎮名未詳處所薩水在遼東都司城東北五百六十里鴨綠江東平壤城西隋將辛世雄戰死於此通定鎮未詳處所

九月帝還東都慰撫使劉士龍伏誅諸將皆除名

宇文述素有寵其子士及尚帝女南陽公主故帝不忍誅與于仲文等皆除名為民斬劉士龍以謝天下諸將皆委罪於仲文帝獨繫之仲文憂恚病卒質實南陽縣名注見周赧王十七年

山東大旱○殺張衡

衡既放廢帝每令親人覘之及還自遼東衡妾告衡怨望謗訕詔賜自盡衡臨死大言曰我為人作何等事而望久活監刑者塞耳促令殺之

書法

張衡何親行弒逆者也何為不書伏誅所以蔽罪於楊廣也然則不具官何衡嘗除名也

發明

衡親行弒逆何以不書伏誅曰在他人則可書誅若廣則不可得而誅之也然衡當為逆之時自謂可以固終身之寵而不知反為所殺是亦天假之手以警逆徒耳

癸酉 九年春正月徵天下兵集涿郡始募民為驍果○靈

武白瑜娑兵起

賊帥白瑜娑劫拔馬連突厥
隴右多被其患謂之奴賊
質實隴右道名注見秦

郡名注見唐玄
宗天寶十五載

命代王侑留守西京質實

代郡名注見秦
王政三年鴈門

以刑部尚書
衛文昇輔之

二月復宇文述官爵

詔曰兵糧不繼乃軍吏失於支料非述
罪也宜復其官爵尋加開府儀同三司

三月濟陰孟海公起兵據周橋質實

濟陰郡名注見漢
光武建武八年周

橋未詳
處所

海公衆至數萬見人稱引書史輒殺之

帝復自將擊高麗命越王侗留守東都

帝議復伐高麗光祿大夫郭榮諫曰千鈞之弩不為鼷鼠發機奈何親辱萬乘以敵小寇乎不聽而行命民部尚書樊子蓋輔侗守東都

集覽

鼷鼠狀如小狐伯勞化地中行食烟火蝨毒及人鳥獸皆不痛

今名甘口鼠乃微乎微者

質實

東都注見秦莊襄王元年三川

齊郡丞張須陀擊王薄等破之

時所在盜起齊郡王薄孟讓北海郭方預清河張金稱平原郝孝德河間格謙勃海孫宣雅各聚衆攻剽多者十餘萬少者數萬人山東苦之天下承平日久人不習兵郡縣吏每與賊戰望風沮敗唯齊郡丞張

須陀得士衆心勇決善戰將郡兵擊王薄大破之薄
北連孫宣雅郝孝德等十餘萬攻章丘須陀帥步騎
二萬擊之賊衆大敗賊帥裴長才等衆二萬掩至城
下須陀未暇集兵帥五騎與戰賊競赴之圍百餘重
身中數創勇氣彌厲會城中兵至賊稍却須陀督衆
擊之敗走郭方預等合軍攻陷北海大掠而去須陀
謂官屬曰賊恃其彊謂我不能救吾今速行破之必
矣乃簡精兵倍道進擊大破之歷城羅士信年十四
從須陀擊賊於濰水上賊始布陳士信馳至陳前刺
殺數人斬一人首擲空中以稍承之揭以畧陳賊徒
愕眙莫敢近須陀因引兵奮擊衆賊大潰須
陀歎賞引置左右每戰須陀先登士信為副**集覽**
注見漢王劉邦四年愕眙愕驚也眙且吏反
直視也亦驚貌前西都賦愕眙而不敢階**賈實**
注見漢景帝三年濟南北海郡名注見漢桓帝永康
元年平原郡名注見陳宣帝大建八年安德河間郡

名注見漢帝立更始二年渤海郡名注見晉穆帝永和六年滄州張須陁闔鄉人一統志云章丘古地名本春秋時齊高唐邑漢為陽丘縣地屬濟南郡東漢省北齊移高唐縣治於此晉因之隋初改為章丘縣唐初屬譚州貞觀初州廢以縣屬齊州宋增置清平軍金廢軍以縣屬濟南府元仍舊焉本朝因之隸濟南府山東地名注見宋文帝元嘉二十五年歷城縣名注見漢光武建武五年歷下

夏四月帝度遼水遣諸將擊高麗

車駕度遼遣宇文述與楊義臣趣平壤王仁恭出扶餘道進至新城高麗兵數萬拒戰仁恭帥勁騎一千擊破之高麗嬰城固守帝命諸將攻遼東聽以便宜從事飛樓撞雲梯地道四面俱進晝夜不息而高麗應變拒之二十餘日集覽扶餘注見新莽始建國元不拔主客死者甚衆集覽扶餘注見新莽始建國元

輶有樓車也所以撞城者撞與輶通音幢又直絳反雲梯以木為之可階而登城也墨子曰公輸般為雲梯以攻宋索隱曰按梯構木瞰高也雲者言其升高若入雲然

六月楚公揚玄感起兵黎陽圍東都

玄感驍勇便騎射好讀書喜賓客海內知名之士多與之遊蒲山公李密弼之曾孫也少有才畧志氣雄遠輕財好士為左親侍帝見之謂宇文述曰左仗下黑色小兒瞻視異常勿令宿衛述乃諷密使稱病自免密遂屏人事專務讀書嘗乘黃牛讀漢書楊素遇而異之與語大悅謂玄感等曰汝等不及也由是玄感與為深交時或侮之密曰若決機兩陳之間喑鳴咄嗟使敵人震懾密不如公驅召天下賢俊各申其策公不如密豈可以階級稍崇而輕天下士大夫邪玄感笑而服之素恃功驕倨或失臣禮帝心銜而不

言及素卒謂近臣曰使素不死終當族滅玄感知之
內不自安且以朝政日紊乃與諸弟潛謀作亂帝方
事征伐玄感自言世荷國恩願為將領帝喜寵遇日
隆頗預朝政至是命玄感於黎陽督運遂與虎賁郎
將王仲伯汲郡贊治趙懷義等謀故為逆逼欲令諸
軍乏食弟即將玄縱萬石並從幸遼東玄感潛召之
皆亡還萬石至高陽為人所執斬於涿郡時來護兒
以舟師自東萊將入海趣平壤玄感遣家奴偽為使
者從東方來詐稱護兒反六月玄感入黎陽大索男
夫移書傍郡以討護兒為名各令發兵會於倉所以
懷義為衛州刺史元務本為黎州刺史河內主簿唐
禧為懷州刺史御史游元督運在黎陽玄感謂曰獨
夫肆虐臨身絕域此天亡之時也我今親帥義兵以
誅無道卿意何如元正色曰尊公荷國寵靈近古無
比公之弟尤青紫交映當謂竭誠盡節上蒼鴻恩豈
意墳土未乾親圖反噬僕有死而已不敢聞命玄感

怒而囚之屢脅以兵不能屈乃殺之元明根之孫也
玄感選運夫少壯者得五千餘人嵩梢三千餘人刑
三牲普衆且諭之曰主上無道不以百姓為念天下
騷擾死遼東者以萬計今與君等起兵以救兆民之
弊何如衆皆踊躍稱萬歲乃勒兵部分唐禧逃歸河
內先是玄感陰遣召李密及弟玄挺密至玄感大喜
問計密曰天子出征遠在遼外去幽州猶隔千里公
擁兵出其不意長驅入薊扼其咽喉高麗聞之必躡
其後不過旬日資糧皆盡其衆不降則潰可不戰而
擒此上計也玄感曰更言其次密曰關中四塞天府
之國雖有衛文昇不足為意今帥衆鼓行而西經城
勿攻直取長安收其豪傑撫其士民據險而守之天
子雖還失其根本可徐圖也玄感曰更言其次密曰
簡兵倍道襲取東都以號令四方但恐唐禘告之先
已固守若引兵攻之百日不克天下之兵四面而至
非僕所知也玄感曰不然今百官家口並在東都若

先取之足以動其心且經城不拔何以示威公之下
計乃上策也遂引兵向洛陽遣玄挺將千人為前鋒
先取河內唐禧據城拒守又使人告東都越王侗等
勒兵為備玄感渡河從者如市使弟積善將兵三千
緣洛水西入玄挺逾邱山南入玄感將三千餘人隨
其後其兵皆執單刀柳楯無弓矢甲冑東都遣河南
人達奚善意將精兵五千人拒積善將作監裴弘策
將八千人拒玄挺善意兵潰鎗仗皆為積善所取弘
策戰敗走玄挺不追弘策退收散兵復結陳以待之
玄挺徐至坐息良久忽起擊之宏策又敗如是五戰
直抵太陽門弘策將十餘騎馳入宮城餘皆歸於玄
感玄感每誓眾曰我身為上柱國家累鉅萬金至於
富貴無所求也今不顧族滅者但為天下解倒懸之
急耳眾皆悅父老爭獻牛酒子弟詣軍門請自効者
日以千數內史舍人常福嗣為玄感所獲使掌文翰
為書遺樊子蓋數帝罪惡云欲廢昏立明子蓋新自

外藩入為京官東都舊官多慢之至於部分軍事未甚承稟裴弘策失利更使出戰不肯行子蓋斬以徇於是將吏震肅無敢仰視令行禁止玄感盡銳攻城子蓋隨方拒守玄感不能克然達官子弟應募從軍者聞弘策死皆不敢入城韓擒虎子世弔等四十餘人皆降於玄感玄感悉以清要重任委之收兵得五萬餘人遣世弔圍滎陽顧覺取虎牢以為鄭州刺史代王侑使衛文昇帥兵救東都至華陰掘楊素塚焚其骸骨示士卒以必死直趨東都城北玄感屢破之玄感身先士卒所向摧陷又善撫悅其下皆樂為之死由是每戰多捷衆至十萬文昇衆寡不敵死傷且盡乃更進屯邙山之陽與玄感決戰會揚玄挺中流矢死玄感

集覽 暗鳴也咄嗟音吐當沒反暗鳴懷怒氣也咄嗟發怒聲也獨夫注見宋

明帝泰始元年三牲即毛遂所謂鷄狗馬血是也天府之國戰國策燕秦說秦惠王曰大王之國地勢形

便此所謂天府之國高誘注天府聚也萬物所聚之地
達奚代北復姓也達官謂有官職得達於君者記檀

弓公之喪諸達官之長
杖世号名也号五各反質實蒲山公李密蒲山縣名未詳處所唯嘉興府平

湖縣東南三十里有蒲山瀕於海邊未知是否李密
隴西成紀人襲父蒲山公爵故稱蒲山公左仗下注

見宋文帝元嘉三十年左細仗主黎陽郡名注見漢
成帝綏和三年汲郡注見秦莊襄王三年贊治官名

主衆曹文書隋文帝改別駕治中為長史司馬煬帝
罷之置贊治唐高祖改贊治曰治中即今之通判是

也逗遛注見漢宣帝本始三年衛州注見秦王政三
年朝歌黎州注見漢成帝綏和三年黎陽河內縣名

注見周赧王五十三年野王懷州注見宋順帝昇平
元年游元廣平任人寶藏之子薊縣名注見漢帝玄

更始二年關中注見唐玄宗開元十一年京兆洛水
注見漢高后三年邛山注見漢靈帝中平六年河南

縣名注見周顯王三年洛陽將作監官名事物紀原云少昊五雉為五工正與唐虞之共工周官考工之所記皆將作之任也秦始置將作少府漢景帝更為大匠隋開皇中改將作寺曰監故大匠之名亦更為監榮陽縣名注見秦莊襄王元年虎牢關名注見晉帝奕太和四年鄭州注見梁武帝普通六年鄭城華陰縣名注見周顯王三十七年陰晉一統志云楊素塚在西安府華陰縣東二十五里

發明

春秋之法凡弑君之賊討在四鄰則責其國討在夷狄則責中國皆所以示急於討賊之

義也楊廣之逆綱目既正其罪於前故凡羣盜之反皆以起兵書之若夫楊玄感者乃楊素之子素首畫謀逆預聞其故則玄感是為逆黨今又舉兵向闕綱目胡為亦書起兵嗚呼於此可以見討賊之尤急矣夫惟急於討賊雖盜賊夷狄皆予其討至於親其逆黨亦不暇顧必志於得賊而後已正

猶今捕盜之法或其徒中自能告首亦與免罪行賞此類是也立法若是可謂嚴哉雖然玄感曷不書討曰討大矣玄感初非真能討賊者使其能指楊廣弑父與君之罪正名舉義若漢王之討項籍名其為賊則綱目亦必以討予之矣然則討賊若此其急為賊者豈有容足之地哉故曰綱目修而

亂臣賊子懼

帝引軍還遣宇文述來護兒等擊楊玄感

遼東城久不拔帝遣造布囊百萬貯土欲積於大道高與城齊使戰士登而攻之又作八輪樓車高出於城欲俯射城內會楊玄感反書至帝大懼引蕪威入帳中謂曰此兒聰明得無為患威曰玄感麓踈必無所慮但恐因此寢成亂階耳帝又聞達官子弟皆在玄感所益憂之兵部侍郎斛斯政素與玄感通謀內

不自安亡奔高麗帝夜召諸將使引軍還資械委棄
衆心恟懼無復部分高麗覺之然疑其詐經二日乃
出兵追躡而不敢逼帝遣虎賁郎將陳稜攻元務本
於黎陽又遣宇文述屈突通乘傳發兵以討玄感來
護兒至東萊聞玄感圍東都召諸將議旋軍救之諸
將咸以無救不宜擅還護兒厲聲曰洛陽被圍心腹
之疾高麗逆命猶疥癬耳公家之事知無不為專擅
在吾不關諸人有沮議者軍法從事即日回軍令子
弘整馳驛奏聞帝時還至涿郡已救護兒救東都見
弘整甚悅先是將軍李子雄坐事除名從軍自効帝
疑之詔鎖子雄送行在所
子雄殺使者逃奔玄感

質實

乘傳注見漢
景帝三年

秋七月餘杭劉元進兵起

元進手長尺餘臂垂過膝自以相表非常陰有異志
會帝再發三吳兵征高麗三吳兵皆相謂曰往歲天

下全盛吾輩父兄征高麗者猶大半不返今已罷弊復為此行吾屬無遺類矣由是多亡命郡縣捕之急

開元進舉兵亡命者雲集旬月間衆至數萬

集覽

餘杭漢會稽郡邑隋置杭州唐改餘杭郡今杭

州餘杭縣是也三吳注見晉安帝元興元年

質實

餘杭縣名注見大業六年

楊玄感引兵趣潼關八月宇文述等追之玄感敗死

楊玄感得帝福嗣委以心膂不復專任李密福嗣每畫策皆持兩端密揣知其意謂玄感曰福嗣元非同

盟實懷觀望明公聽之必為所誤請斬之玄感不聽密退謂所親曰楚公好反而不欲勝吾屬今為虜矣

李子雄勸玄感速稱尊號玄感以問密密曰兵起以來雖復頻捷至於郡縣未有從者東都守禦尚彊天

下救兵益至公當挺身力戰早定關中乃亟欲自尊何示人不廣也玄感笑而止屈突通引軍屯河陽宇

文述繼之子雄曰通曉習兵事若一得渡河則勝負難決不如分兵拒之通不能濟則樊衛失援玄感然之將拒通樊子蓋知其謀數擊其營玄感不得往通濟河軍於破陵玄感分為兩軍西拒文昇東拒通子蓋復出兵大戰玄感軍屢敗子雄曰援軍益至不可久留不如直入關中開永豐倉以賑貧乏三輔可指麾而定據有府庫東面而爭天下亦霸王之業也會華陰諸楊請為鄉導玄感引兵西趣潼關宇文述等諸軍躡之至弘農宮太守蔡王智積曰玄感聞大軍將至欲西圖關中若成其計則難克也當以計縻之使不得進不出一旬可以成擒及玄感軍至城下智積登陴詈之玄感怒留攻之李密諫曰公今詐衆西入軍事貴速况乃追兵將至安可稽留若前不得據關退無所守大眾一散何以自全玄感不從遂攻之三日不拔乃引而西至閔鄉宇文述衛文昇來護兒屈突通等軍追及之玄感布陳亘五十里且戰且行

一日三敗乃獨與十餘騎奔上洛自度不免謂積善曰我不能受人戮辱汝可殺我積善抽刀所殺之因自刺不死

集覽

潼關注見漢獻帝建安十六年閔鄉注見晉安帝義熙十三年

質實

河陽縣名注見唐昭宣帝天祐二年樊衛謂樊子蓋衛文昇破陵地名未詳處所三輔注見漢武帝征和元年弘農郡名注見周顯王四十五年陝蔡國名注見秦二世二世上蔡登陴注見梁武帝天監二世上洛縣名注見晉

元帝大興元年

發明

綱目立法甚嚴場既書弑故凡羣盜及反者皆書起兵其間亦有死節如御史游元將軍

獨孤盛給事許善心之類皆不得書於冊蓋以其盡節於弑逆之人故不足予之耳至是上書來護兒擊玄感不以討書此書玄感敗死不書伏誅下書殺玄感黨與亦不書誅書法若此可謂得春秋

謹嚴之音矣一字褒
貶非君子孰能修之

以唐公李淵為弘化留守

帝以弘化留守元弘嗣斛斯政之親也遣衛尉少卿
李淵馳往執之因代為留守淵御衆寬簡人多附之
帝以淵相表奇異又名應圖識忌之未幾徵詣行在
所淵遇疾未謁其甥王氏在後宮帝問曰汝舅來何
遲王氏以疾對帝曰可得死否
質實弘化郡名注見
淵聞之懼因縱酒納賂以自晦
質實周顯王四十一
年義
渠

吳郡朱燮晉陵管崇兵起

燮涉獵經史頗知兵法為崑山縣博士與數十學生
起兵民苦役者赴之如歸崇志氣倜儻隱居常熟群

盜相與奉之時帝在涿郡命虎牙郎將趙六兒將兵萬人屯楊子以備南賊崇遣將陸顛襲破其營收其器械軍資

集覽

常熟漢吳郡縣按吳郡隋改蕪州今平江府是楊子今直州縣縣南有楊

子江與浙西鎮江府分界

質實

吳郡注見漢獻帝建興三年晉陵郡名注見大業十二年毘陵一統

志云崑山縣本秦之婁縣地屬會稽郡漢因之晉屬吳郡梁天監中置信義縣大同初又分置崑山縣以

山為名隋初二縣俱廢尋復置崑山縣屬吳郡唐屬蕪州宋屬平江府元陞為崑山州至本朝初改為縣

屬蕪州府倜儻注見後漢主延熙十四年常熟本漢之吳縣地名晉初分置海虞縣屬吳郡東晉又分置

南沙縣屬晉陵郡梁又分置常熟縣屬信義郡隋徙常熟治南沙而以海虞縣省入屬蕪州唐武德間移

治海虞城宋屬平江府元陞為常熟州至本朝初復改為縣屬蕪州府揚子江名注見文帝開皇十年集

覽指為縣名蓋揚子縣乃唐永淳初始
置隋時曷嘗有揚子縣哉觀者察焉

殺楊玄感黨與三萬餘人

帝使大理卿鄭善果御史大夫裴蘊刑部侍郎骨儀
與留守樊子蓋推玄感黨與謂曰玄感一呼而從者
十萬益知天下人不欲多多即相聚為盜耳不盡加
誅無以懲後由是所殺三萬餘人枉死者大半玄感
之圍東都也開倉賑給百姓凡受米者皆坑之於都
城之南玄感所善文士王胄坐從邊亡命捕得誅之
帝善屬文不欲人出其右薛道衡死帝曰更能作空
梁落燕泥否胄死帝誦其佳句曰庭草無人隨意綠
復能作此語邪帝自負才學每驕天下之士常謂侍
臣曰天下皆謂朕承藉緒餘而有四海設令朕與士
大夫高選亦當為天子謂祕書郎虞世南曰我性不
喜人諫若位望通顯而諫以求名者彌所不耐至於

卑賤之士雖少寬假然卒不置之骨儀姓名也集覽承藉緒餘緒

地也承藉他人殘餘之業也莊質實鄭善果鄭州榮

子讓玉篇其緒餘以為國家澤人虞世南餘 姓人荔 之子

冬十月遣將軍吐萬緒擊劉元進

劉元進將渡江會揚玄感敗朱變管崇共迎元進推以為主據吳郡稱天子署置百官毘陵東陽會稽建

安豪傑多執長吏以應之帝遣左屯衛大將軍吐萬緒光祿大夫魚俱羅將兵討之吐萬緒吐集覽

萬復姓也毘陵郡名注見大業十二年東陽郡質實名注見晉哀帝興寧三年會稽郡名

注見漢和帝永元元年建安郡名注見晉武帝泰始五年

十一月將軍馮孝慈擊張金稱敗死○十二月內史舍人韋福嗣等伏誅

楊玄感之西也帝福嗣亡詣東都歸首樊子蓋得其書草封以呈帝帝命執送行在李密亡命為人所獲送東都子蓋鎖送福嗣密及楊積善王仲伯等十餘人詣高陽密與仲伯等竊謀亡去恚使出其所賫金以示使者曰吾等死日此金並留付公幸用相瘞其餘即皆報德使者許諾防禁漸弛密請通市酒食每宴飲諠譁竟夕使者不以為意行至魏郡石梁驛飲防守者皆醉穿墻而逸密呼福嗣福嗣曰我無罪天子不過一面責我耳至高陽帝以書草示福嗣收付大理宇文述請為重法以肅將來十二月就野外縛諸應刑者於格上使九品以上持兵集覽格上格謂所射支體糜碎積善福嗣仍加卓裂集覽戰格即今

彭排也釋名彭旁也言

質實

高陽縣名注見晉愍帝建興四年魏邵注見漢

元帝建昭二年石梁驛未詳處所車裂注見晉元帝太興三年輟

書法

誅母乃助之虐乎福嗣反覆見義不明數庶

十罪似也未幾而亡歸自首矣亦既鎖送李密呼與俱去乃自謂無罪猶冀苟全綱目獨書伏誅所以別於起義者也

發明

常福嗣亦益感之黨何以獨書伏誅福嗣既

感於敗死今又亡詣東都自首則是反覆背叛之人耳故特書誅以罪之夫豈予煬之討有罪哉

唐縣扶風妖人作亂討平之質實

一統志云唐縣漢初所置屬中山國即堯

為唐侯國於此春秋為鮮虞邑北齊省入安喜縣隋復置唐縣屬定州唐因之五代梁改為中山縣晉改為博陵縣漢復為唐縣宋金元俱仍舊本朝因之
改屬保定府扶風郿名注見周顯王八年岐 ○吐萬

緒擊劉元進破之管崇敗死詔徵緒還遣王世充代將元進朱變皆敗死

劉元進攻丹陽吐萬緒濟江擊破之元進結柵拒緒相持百餘日元進兵潰夜遁保壘與朱變管崇等連營百餘里緒乘勝進擊復破之斬崇然百姓從亂者如歸市賊敗而復聚其勢益盛緒以士卒疲弊請息甲待來春帝不悅魚俱羅亦以賊非歲月可平潛迎諸子於洛帝怒有司希旨奏緒怯懦俱羅敗衄俱羅坐斬徵緒詣行在緒憂憤道卒帝更遣江都丞王世充發淮南兵數萬人討元進世充渡江頻戰皆捷元

進變敗死餘衆降散世充召降者於通玄寺佛像前焚香為誓約降者不殺散者聞之歸首畧盡世充悉阮之死者三萬餘人由是餘黨復相聚為盜官軍不能討以至隋亡帝以世充有將帥才益加寵任又詔凡為盜者籍沒其家時群盜所在皆滿

集覽

敗血反

杜也亦質實丹陽郡名注見漢

明帝永平十三年

杜伏威起兵掠江淮

章丘杜伏威與臨濟輔公柘為刎頸交俱亡命為羣盜伏威年十六每出則居前入則殿後由是其徒推以為帥下邳海潮亦聚眾為盜伏威使公柘謂之曰我與君同苦隋政各舉大義力分勢弱常恐被擒若合而為一則可以敵隋矣君能為主吾當敬從自揆不堪宜來聽命不則一戰以決雌雄海潮懼即帥

其眾降之伏威與戰陽敗引潁眾入葭蒂中因從上風縱火
之伏威與戰陽敗引潁眾入葭蒂中因從上風縱火
潁眾皆皆集覽輔公祐輔姓也左傳有晉大夫輔樂又
智果以智伯必貳其宗改姓輔氏殿後

燒死注見漢昭烈帝章賢實臨濟縣名注見秦二世二年
武二年潁胡杲反下邳縣名注見漢高帝六年

甲戌十年春二月徵天下兵伐高麗三月帝如涿郡秋七

月次懷遠鎮高麗遣使請降

詔百僚議伐高麗數日無敢言者遂復徵天下兵百
道俱進三月帝發高陽士卒在道亡者相繼至臨渝
宮禡祭斬叛軍者以蒙鼓亦不能止時天下已亂所
徵兵多不至高麗亦困弊來護兒至卑奢城高麗舉
兵逆戰護兒擊破之將趣平壤高麗王元懼遣使乞
降因送斛斯政帝大悅遣使持節台護兒還護兒集

衆曰大軍三出未能平賊勞而無功吾竊耻之今高麗實困以此衆擊之不日可克吾欲進兵徑圍平壤取高元獻捷而歸不亦善乎荅表請行長史崔君肅固爭護兒不可曰吾在閫外事當專決寧得高元還而獲譴捨此成功所不能也君肅告衆曰若遠詔書必當獲罪諸將懼俱請還護兒乃奉詔八月帝班師邯鄲賊帥楊公卿帥其黨八千人抄駕後

集覽

禡祭說文

師旅所止地祭之於內曰類於野曰禡記王制天子將出征類乎上帝禡於所征之地注禡師祭也為兵禱也其禮亦亡禡馬怕反又音百大雅曰是類是禡師祭也禡鼓應劭曰禡祭也新鼓殺牲以血塗禡郊因而祭之曰禡瑣曰按禮記及大戴禮有禡廟之禮皆無祭事索隱曰說文禡血祭也司馬法曰血於鞶鼓者神戎器也顏師古曰凡殺牲以血祭者皆名為禡臣瓚以為皆無祭事非也今禡鼓謂殺之以塗禡

於鼓爾春秋傳不以纍臣纍鼓即其義也又左傳定
四年君以軍行袞社纍鼓注師出先有事袞禱於社
纍之宜社於是殺牲以血塗鼓鞀為纍鼓
袞音弗飛黃良馬名古賦云飛黃服卓
臨渝宮在永平府撫寧縣境內卑奢城未詳處所班
師注見陳後主禎明元年邯鄲縣名注見周威烈王
二十三年

書法

前書擊高麗矣此書伐何竟降賊也弑逆之
賊夷狄得而誅之既降賊矣故特從恒辭書

伐

冬十月還西京

以高麗使者及斛斯政告太廟仍徵高麗王元入朝
元竟不至敕將帥嚴裝更圖後舉竟不果行初開皇

之末國家殷盛朝野皆以高麗為意劉炫獨以為不可作撫夷論以刺之至是其言始驗殺斛斯政烹其肉使百官噉之佞
質實劉炫河間景城人
者或噉之至飽

十一月祀南郊大風

有事於南郊帝不齋於次詰朝備法駕至即行禮是日大風一獻禮畢御馬疾驅而歸胡氏曰董子有言自非大無道之君天必扶持而安全之故時出災異以警戒之至於再至於三而猶不悛然後改命有德若隋煬十有四年之間無復災異之變蓋其奪宗為儲是日四海地震天既以告文帝而不知戒焉則亦已矣天意若曰罪惡如煬者非所告也中間山東河南大水底柱偃河逆流則是徵兵遠伐山東盜起人心愁怨侵迫陰陽之應爾或曰使煬而知懼罷兵脩政可有瘳乎曰罪有輕重惡有大小惡輕罪小悔而

改往聖人所許也五刑之屬三千而無弑父之條是不孝不足以盡之而煬也犯馬縱使息後罷兵省德脩政是一杯水不足以救一車薪之火亦無全而歸之之理矣至是郊而大風正與慕容超同符蓋天動威以絕

集覽

齋於次周禮王朝日祀五帝則張大次小次鄭元曰大次以候止息小次以候

行禮山谷集曰凡言設大次小次者皆幄也大次在壇壝之外小次去壇遠矣董子董仲舒奪宗為儲太子曰儲君煬帝初為晉王謀廢太子勇而求為太子是為奪宗底柱暝河事在大業七年底柱注見漢成帝綏和二年與慕容超同符慕容超南燕王也晉安帝義熙四年超祀南郊大風晝晦羽儀帷幄皆毀裂義熙六年晉劉裕

質實

詰朝注見梁武帝大同二年法駕注見漢高后八年

執超斬於建康

書法

慕容超祀南郊嘗大風矣不書大風畧之也未幾而南燕滅也於是祀南郊書大風隋之

滅也

決矣

發明

煬有天地不容之罪乃欲郊見上帝宜乎不獲顧饗之報也書祀南郊大風天誅之意為

可知

矣噫

離石胡劉苗王兵起集覽

離石胡劉苗王晉末匈奴左賢王法罕之孫劉淵嘗都離

石故曰離石胡也苗王劉淵之裔也離石注見晉惠帝永興元年

眾至數萬

汲郡王德仁起兵據林慮山質實

汲郡注見秦莊襄王三年汲林慮山注見

漢帝玄更始二年

擁衆
數萬

十二月帝如東都殺太史令庾質

帝將如東都太史令庾質諫曰比歲伐遼民實勞弊
陛下宜鎮撫關內使百姓盡力農桑三五年間四海
稍豐實然後巡省於事為宜帝不
悅質辭疾不從帝怒下質獄殺之
質實
東都注見秦
三川陛下注見漢光
武建武二十七年

齊郡孟讓兵掠盱眙王世克擊破之

孟讓自長白山寇掠諸郡至盱眙衆十餘萬據都梁
宮阻淮為固江都丞王世克將兵拒之柵塞險要羸
形示弱民間亦皆結堡自固野無所掠賊衆漸餒乃
留兵圍柵分人於南方抄掠世克伺其懈縱兵出擊

大破之讓遁去集覽長白山在黃龍府西今遼東咸陽府界

里白衣觀音所居其山禽獸皆白黑水發源於此名粟末河契丹主德光破晉改名混同江都梁宮都

梁郡名今招信軍是也盱眙縣西有都梁山隋於此置宮因名馬其山出都梁香正誤長白山今

按長白山在淄州宋白曰隋改武彊為長山縣以縣西南山十五里長白山得名大業七年鄒平民王薄

據長白山剽掠齊濟之郊集覽以為在遼東非也質實齊郡注見漢景帝三年濟南盱眙縣名注

見秦二世二年一統志云都梁宮在鳳陽府盱眙縣西南三里今名都梁臺相傳隋煬帝所築遺址尚存

江都縣名注見漢獻帝興平元年年抄掠注見恭帝皇泰二年

以張須陁為河南討捕大使

齊郡賊帥左孝友衆十萬屯蹲狗山張須陁列營逼之孝友窘迫出降須陁威振東夏以功遷通守領河南道十二郡黜陟討捕大使涿郡賊帥盧明月衆十餘萬軍祝阿須陁將萬人邀之相持十餘日糧盡將退謂將士曰賊見吾退必悉衆來追若以千人襲據其營可有大利此誠危事誰能往者衆莫對唯羅士信及秦叔寶請行於是須陁委柵而遁使二人分將千兵伏葭葦中明月悉衆追之士信叔寶馳至其柵柵門閉二人超升其樓各殺數人營中大亂二人斬關以納外兵因縱火焚其三十餘柵烟焰漲天明月奔還須陁回軍奮擊大破之明質寶河南地名注見月以數百騎遁去所俘斬無筭宋主昱元徽元年蹲狗山未詳處所祝阿縣名注見周烈王六年秦叔寶即秦瓊齊州歷城人

乙亥十一年春正月增秘書省官百二十員

帝好讀書著述自為揚州總管置王府學士至百人常令脩撰自經術文章兵農地理醫卜釋道乃至菹博鷹狗皆為新書無不精洽共成萬七千餘卷初西京嘉則殿有書三十七萬卷帝命秘書監柳顧言等詮次除其復重猥雜得三萬七千餘卷納於東都賢脩文殿又寫五十副本分置西京東都宮省官府賢

實

揚州注見漢武帝元朔五年淮南蒲博注見晉明帝太寧三年

發明

學之為王者事其已久矣堯舜禹湯文武沒沒仲尼皇皇皆是物也自後世以來人主好

學者無幾然亦有好之而無補於事如梁繹隋煬之徒者何哉夫學之為道雖非一端要以孝弟仁義為本二君為子則不孝為弟則不悌為君則不仁為人則不義是其大本已失矣雖朝誦夜習亦復何益况又其所謂學亦徒從事華藻之末者乎綱目於隋書其增秘書官至百二十員之眾若足

以見崇尚之意然其虛文無實棄
本事末之義亦固隱然在其中矣

二月詔村塢皆築城○上谷王須拔魏刀兒兵起

上谷賊帥王須拔自稱漫天王魏刀兒自稱
歷山飛衆各十餘萬北連突厥南寇燕趙
質實谷

郡名注見秦王政三年突厥北狄國名注見梁武帝
大同十一年燕趙二國名燕注見唐高祖武德四年

幽州趙注見
漢景帝三年

殺郟公李渾夷其族

初高祖夢洪水沒都城意惡之故遷都大興申公李
穆卒孫筠襲爵叔父渾忿其吝嗇使兄子善衡殺之
而謂妻兄宇文述曰若得紹封當歲奉國賦之半述
為之言得為嗣二歲後遂不復以國賦與述述大恨

之至是累官大將軍改封郟公帝以其門族彊盛忌
 之會有方士言李氏當為天子勸帝盡誅李姓渾從
 子將作監敏小名洪兒帝疑其名應識嘗面告之冀
 其引決敏大懼數與渾及善衡屏人私語述諧之於
 帝遣即將裴仁基表告渾反帝收渾等遣裴蘊等雜
 治之數日不得反狀帝更遣述述誘教敏妻為表誣
 告渾謀因度遼與子弟襲御營立敏為天子持入集
 奏之殺渾敏善衡及宗族三十二人敏妻亦鶴死

覽 郟字亦作成春秋魯孟氏邑杜預曰泰山郡鉅平
 縣東南有成城括地志云故郟城在兗州泗水縣

西北引決注見宋 **質實** 申縣名注見齊武帝永明五
 明帝泰始七年 年李穆趙郡平棘人一統志

云郟隋之縣名屬魯郡即春秋時郟子國唐初屬
 兗州後省之故城在兗州府汶上縣北三十二里

發明 國之將亡必有妖孽隋文以篡弑得國猜忌
 殘忍殺戮甚多初無祈天永命之德身且不

保諸子皆非良死不善之報昭然甚明况煬又以惡逆趣之固無延世之理圖識之言雖不為無據然不可得而移也李渾之死書殺書爵則其無罪可知然使殺之果當其罪則夫群盜蝟集亦豈能長保有國哉末年江都之既乃宇文氏而非李氏亦可以為濫殺無辜者之戒矣殷鑒若此猶有以官爵封邑皆有武字而殺李君羨為女主武氏之應者其亦可哀也哉

孔雀集朝堂百官稱賀

有二孔雀自西苑飛集朝堂親衛校尉高德儒等十餘人見之奏以為鸞時孔雀已去無可得驗於是百官稱賀拜德儒朝**質實**孔雀格物論孔雀文禽也廣散大夫賜物百段益諸州所產高四五尺雌者尾短無金翠雄者五年始成初春而生三四月後復凋與華萼俱榮衰土人取其尾者持刀於叢篁幽隱

處伺過急斷其尾回首
一顧金翠無復光彩矣

書法

直書其事貶
義自見矣

夏四月帝如汾陽宮○以李淵為山西河東撫慰大使

以淵承制黜陟討捕羣盜淵行

至龍門擊賊帥卞端兒破之

質實

一統志云山西
古冀州地漢冀

州西境河東等郡屬司隸置并州部刺史察舉太原

上黨雲中鴈門等郡而不常所治東漢并州治晉陽

唐貞觀初置河東道開元中置河東採訪處置使治

蒲州後改採訪為觀察其治仍舊宋置河東路經畧

安撫使以太原守臣兼領元以冀寧諸路直隸省部

置河東山西道宣慰使司於大同置河東山西道肅

政廉訪司於冀寧至本朝置山西等處承宣布政使

司領太原平陽大同三府澤潞汾遼五州云河東郡

名注見漢獻帝建安七年龍
門縣名注見文帝仁壽三年

秋八月帝巡北邊突厥始畢可汗入寇帝入鴈門始畢

圍之九月乃解考異

提要入
作之

初裴矩以突厥始畢可汗部衆漸盛獻策分其勢欲
以宗女嫁其弟叱吉設拜為南面可汗叱吉不敢受
始畢聞而慚怨突厥之臣史蜀胡悉多謀畧矩詐與
為互市誘殺之遣使詔始畢曰史蜀胡悉叛可汗來
降我已相為斬之始畢由是不朝八月帝巡北邊始
畢帥騎數十萬謀襲乘輿義成公主先遣使者告變
車駕馳入鴈門齊王暕以後軍保崞縣突厥圍鴈門
城中兵民十五萬口食僅可支二旬鴈門四十一城
突厥盡克之唯鴈門崞不下突厥急攻鴈門矢及御
前帝大懼抱趙王杲而泣日盡腫宇文述勸帝簡精

銑潰圍而出蘇威曰城守則我有餘力輕騎乃彼之所長陛下萬乘之主豈宜輕動尚書樊子蓋曰陛下乘危徼幸一朝狼狽悔之何及不若據堅城以挫其銳坐徵四方兵使入援陛下親撫循士卒論以不復征違厚為勳格必人人自奮何憂不濟內史侍郎蕭瑀以為突厥之俗可賀敦預知軍謀且義成公主以帝女嫁外夷必恃大國之援若使一介告之借使無益庸亦何損又發明詔諭將士以赦高麗專討突厥則衆心皆安人自為戰矣瑀皇后之弟也虞世基亦以是勸帝帝從之帝親巡將士謂之曰努力擊賊苟能保全凡在行陳勿憂富貴必不使有司弄刀筆破汝勲勞乃下令守城有功者無官直除六品有官以次增益於是衆皆踴躍晝夜拒戰又詔天下募兵守令俱來赴難李淵之子世民年十六應募隸屯衛將軍雲定興說之曰始畢敢舉兵圍天子必謂我倉猝不能趕援故也宜晝則引旌旗令數十里不絕夜則

鉦鼓相應虜必謂救兵大至望風遁去定興從之帝遣間使求救於義成公主公主遣使告始畢云北邊有急諸郡援兵亦至九月始畢解圍去集覽叱吉設帝遣騎追躡得老弱二千餘人而還突厥謂別部興兵者曰設叱吉其號也崞縣注見晉懷帝永嘉四年勳格勳王功也格者百官有司之所常行者也唐太宗時士卒以軍功致位五品者豫士流時人謂之勳格可賀教注見梁武帝普通元年質實乘輿注見漢安帝延光四年鴈門郡名注見秦王政三年義成縣名注見唐懿宗咸通十年狼狽注見漢獻帝初平三年滿瑀蘭陵人梁明帝之子

書法

高帝書被圍平城不以足加首也此書始畢圖之何廣賊也突厥圍之不足為賊諱也然

則昌為以入寇書就逆之賊夷狄得而誅之乃復解圍是縱賊也故從恒辭書寇

冬十月帝還東都考異

此上間無異事帝字羨

車駕還至太原蘇威曰今盜賊不息士馬疲弊願陛下亟還西京深固根本為社稷計帝初然之宇文述曰從官妻子多在東都宜向洛陽自潼關入帝從之既至東都顧眄街衢謂侍臣曰猶大有人在有意謂平楊玄感殺人尚少故也蘇威追論勳格太重宜加斟酌樊子蓋固請以為不宜失信帝曰公欲收物情邪子蓋懼不敢對帝性吝官賞初平楊玄感應授勳者多乃更置戎秩建節奮武宣惠綏德懷仁秉義奉誠立信等尉將士守鴈門者萬七千人至是得勳者纔千五百人一戰得第一勳者進一階先無戎秩者止得立信尉無勳者四戰進一階又議伐高麗由是將士憤怨初蕭瑀以外戚有才行得字機要瑀性剛鯁數言事忤旨帝漸疎之及鴈門圍解帝謂羣臣曰突厥狂悖勢何能為蕭瑀遽相恐動情不可恕候衛將

軍揚子崇從至汾陽知突厥必為寇屢請早還不納至是怒之曰子崇怯懦驚動衆心不可居爪牙官皆出為質實太原郡名注見齊明帝建武三年并州社稷注見新莽天鳳元年潼關注見漢獻帝郡守

詔江都更造龍舟

揚玄感之亂龍舟皆焚詔江都質實艘疏鳩反船之更造數十艘制度仍大於舊者總名江都縣名注見漢獻帝興平元年

東海李子通據海陵

子通有勇力先依長白山賊帥左才相羣盜皆殘忍而子通獨寬仁由是人多歸之未半歲有衆萬人才

相忌之子通引去度淮與杜伏威合伏威選軍中壯士養為假子凡三十餘人濟陰王雄誕臨濟闕稜為之冠既而子通謀殺伏威遣兵襲之伏威被創雄誕負之以逃收散兵復振將軍來整又擊子通破之子通帥其餘眾奔海陵

質實 東海郡名注見秦二世二年郊淮水名注見漢後主復收兵得二萬人

建興二年臨濟縣名注見秦二世二年濟陰縣名注見漢光武建武八年海陵縣名注見周世宗顯德五年

城父朱粲兵起

粲始為縣佐史從軍亡命聚眾為盜謂之可達寒賊自稱迎樓羅王眾至十餘萬引兵轉掠荆汙及山南郡縣所過**集覽** 城父注見秦二世二年下城父**質實** 焦類無遺 焦類注見漢宣帝地節四年

荆沔二州名荆注見漢獻帝建安十
二年沔注見晉孝武帝太元六年

十二月李淵擊敬盤陀等降之

詔樊子蓋發關中兵數萬擊絳賊敬盤陀等自汾北
村塢盡焚之賊有降者皆坑之百姓怨憤益相聚為
盜詔以李淵代之有降者淵
引置左右由是賊衆多降
集覽 汾北汾水之北注
見周威烈王二十
三年
質實 絳州名注見宋文帝
元嘉二十三年東雍

御批資治通鑑綱目卷三十七上

欽定四庫全書

御批資治通鑑綱目卷二十七下

丙子

十二年

楚帝林士弘
太平元年

春正月分遣使者發兵擊諸起

兵者

朝集使不至者二十餘郡始議分遣使者十二道發兵討捕盜賊

集覽

朝集使自外入朝與朝班

者曰朝集使

書法

諸起兵者何惡廣也綱目賊廣故不書群盜書諸起兵者此綱目之新例也凡書起兵者

皆以自敗為文

發明

分注載討捕盜賊而綱目乃變文書發兵擊諸起兵者書法如此畧無一毫怨場之意其

討賊之意終始不易凡此類非綱目不能脩也

作毘陵宮

詔毘陵通守集十郡兵數萬人於郡東南起宮苑周圍十二里內為六十離宮大抵倣東都西苑之制而奇麗

過之集覽

毘陵春秋吳延陵季子之邑秦置會稽郡延陵屬焉漢改延陵為毘陵晉置毘陵郡

隋改常州質實

一統志云毘陵古邑名秦為會稽郡地漢因之東漢永建中分屬吳郡三國吳分無

錫以西為屯田置典農校尉晉太康初省校尉分吳郡置毘陵郡東晉初改為晉陵郡徙治京口後遷治晉陵縣宋齊梁陳皆因之隋開皇中廢郡置常州大業初改為毘陵郡唐武德初復改為常州天寶初又

改為晉陵郡乾元初復為常州五代時屬揚吳及南唐仍改為常州屬浙西路元陞為常州路隸江浙行省本朝初改為常州府直隸京師毘陵宮注見大業元年離宮

三月宴羣臣於西苑

上已帝與羣臣飲於西苑水上命學士采古水事七十二以木為之間以妓船酒船人物自動能成音曲

發明 孟子曰不仁者可與言哉安其危而利其菑樂其所以亡者不仁而可與言則何亡國敗家之有隋煬至此滅亡無日方且更造龍舟作毘陵宮今又宴遊西苑沉湎不已雖天醜其惡將欲殪之然煬之所以自速其亡者亦太甚矣綱目悉書於冊觀者可不鑒哉

張金稱擊破平恩等郡考異

郿當作縣

金稱比諸賊尤殘質實子遺注見齊主昭業隆昌元

暴所過民無子遺年平恩縣名注見梁武帝天

夏四月大業殿火

大業殿西院火帝以為盜起驚走匿草間火定乃還帝自八年以後每夜眠中恒驚悸云有賊令數婦人搖撫乃得眠

魏刀兒將甄翟兒攻太原將軍潘長文戰死○五月朔

日食既質實日食既注見漢惠帝七年

書法食既大變也間一歲而隋亡矣綱目書食既十有二無不有應者詳漢惠帝七年免者其

惟漢明

帝乎

除納言蘇威名

帝問侍臣盜賊翊衛大將軍宇文述曰漸少納言蘇威引身隱柱帝呼問之對曰臣非所司不喻多少但患漸近帝曰何謂也威曰他日賊據長白山今近在汜水且往日租賦丁役今皆何在豈非其人皆化為盜乎比見奏賊皆不實遂使失於支計不時剪除又昔在鴈門許罷征遼今復徵發賊何由息帝不悅屬五月五日百僚多饋珍翫威獨獻尚書或謂之曰尚書有五子之歌威意甚不遜帝益怒頃之帝問威以伐高麗事威欲帝知天下多盜對曰今茲之役願不發兵但赦羣盜自可得數十萬遣之東征高麗可滅帝不懌威出裴蘊奏曰此大不遜天下何處有許多賊帝曰老革多姦以賊脇我欲批其口且復隱忍蘊

知帝意遣河南白衣張行本奏威音典選濫授人官
案驗獄成詔除名為民後月餘復有奏威與突厥陰
圖不軌者蘊處威死威無以自明但推謝集覽老革
而已帝憫而釋之遂并其子孫皆除名革音

棘三國漢彭美罵昭烈曰老革荒悖注革獸皮也老
革皮色枯瘁之形一說革兵也罵為老革猶老兵也

質實

汜水注見漢王邗四年尚書上古之書即伏生
所授者今謂之書經凡五十九篇五子之歌書

傳云五子夏啓之子太康之弟也歌與帝舜作歌
之歌同義詳見夏書不軌注見漢靈帝光和五年

秋七月帝如江都命越王侗留守殺諫者任宗崔民象

王愛仁考異

提要命越王侗留
守在王愛仁下

江都龍舟成送東都宇文述勸幸江都帝從之將軍
趙才諫曰今百姓疲勞府藏空竭盜賊蜂起禁令不

行願陛下還京師安北庶帝大怒以屬吏旬日出之
朝臣皆不欲行無敢諫者建節尉任宗上書極諫即
日於朝堂杖殺之遂幸江都命越王侗與光祿大夫
段達太府卿元丈都民部尚書常津右武衛將軍皇
甫無逸右司郎盧楚等總留後事帝以詩留別宮人
曰我夢江都好征遼亦偶然奉信即崔民象以盜賊
充斥於建國門上表諫帝大怒先解其頤然後斬之
虞世基以盜賊充斥請發兵屯洛口倉帝曰卿是書
生定猶懼怯敕移箕山公路二府於倉內仍令築城
以備不虞至汜水奉信即王陵仁復上表請還西京
斬之至梁都郡人邀駕上書曰陛下若
遂幸江都天下非陛下之有又斬之

質實

皇甫無
逸萬年

人盧楚范陽人景祚之孫箕山公路二府未詳其義
唯河南府登封縣東南三十里有箕山注見新莽始
建國四年又鳳陽府城及盱眙縣境有公路城相傳
皆漢末袁術所築此二處未知是否姑錄此以備參

考洛口倉注見大業七年梁郡注見漢景帝三年梁國

書法

殺諫者多矣未有以諫者書書諫者何罪廣且予三子也三子官微書諫者予之也十年

如東都殺庾質今年如江都殺諫者三人焉自古未有好遊復諫如煬帝者矣若是有不亡乎

發明

煬之必亡豈待殺諫者而後及哉然猶列書之者所以為後世戒耳綱目豈獨為煬設乎

遣光祿大夫陳稜擊李子通等敗之

時李子通據海陵左才相掠淮北杜伏威屯六合衆各數萬帝遣稜將宿衛精兵八十討之往往克捷

質實

六合縣名注見陳宣帝太建五年秦郡

冬十月許公宇文述卒

初述子化及智及皆無賴化及事帝於東宮帝寵昵之從幸榆林化及智及冒禁與突厥交市帝怒將斬之既而釋之賜述為奴述卒帝復以化質實許縣名及為右屯衛將軍智及為將作少監
光武建武八年長社東宮注見宋文帝元嘉二十七年突厥北狄國名注見梁武帝大同十一年榆林郡名注見文帝開皇十九年勝州

書法

述也卒書爵何著廣私也廣之大逆述有力焉網目前以復官爵書此以爵卒廣之微情著矣是故以爵卒賈充所以著晉氏之私以爵卒宇文述所以著楊廣之私

翟讓李密起兵攻滎陽張須陁擊之敗死

李密之亡也往依郝孝德孝德不禮之又入王薄薄亦不之奇也密因之變姓名聚徒教授郡縣疑而捕

之密亡去抵其妹夫雍丘令丘君明君明轉寄於遊俠王秀才家為君明從姪懷義所告帝令懷義與梁郡通守楊汪捕之汪遣兵圍秀才宅值宓出外獲免常城崔讓為東都法曹坐事當斬獄吏黃君漢奇其驍勇夜謂讓曰天時人事抑亦可知豈能守死獄中乎讓驚喜叩頭君漢即破械出之讓再拜曰讓蒙再生之恩則幸矣柰曹主何因泣下君漢怒曰今以公為大丈夫可救生民之命故不顧其死以奉脫柰何反效兒女子涕泣相謝乎君但努力自勉勿憂吾也讓遂亡命於九崗為羣盜同郡單雄信驍健善馬槊聚少年往從之雖狐徐世勳年十七有勇畧說讓曰東郡於公與勳皆為鄉里人多相識不宜侵掠滎陽梁郡汴水所經剽行舟商旅足以自資讓然之引眾入二郡界掠公私船資用豐給附者益眾至萬餘人時又有外黃王當仁濟陽王伯當帝城周文舉雍丘李公逸等皆擁眾為盜李密自雍丘亡命往來諸帥

間說以取天下之策始皆不信久之稍以為然相謂曰今人皆云楊氏將滅李氏將興吾聞王者不死斯人再三獲濟豈非其人乎由是漸敬密密察諸帥唯翟讓最強乃因王伯當以見讓為讓畫策往說諸小盜皆下之讓悅密因說讓曰劉項皆起布衣為帝王今主昏於上民怨於下統兵盡於遼東和親絕於突厥方且巡遊揚越委棄東都此亦劉項奮起之會也以足下雄才大畧士馬精銳席卷二京誅滅暴虐隋氏不足亡也讓謝曰吾儕羣盜偷生草間君言非所及也有李元英者自東都逃來經歷諸賊求訪李密云斯人當代隋家人問其故元英言比來民間謠歌曰桃李子皇后繞揚州宛轉花園裏莫浪語誰道許桃李子謂逃亡者李氏之子也莫浪語誰道許者密也既與密遇遂委身事之前宋城尉房彥藻自負其才恨不為時用預於楊玄感之謀變姓名亡命遇密遂與俱遊漢沔入諸賊說其豪傑還日從者數百

人仍為遊客處於讓營讓見密為豪傑所歸欲從其計猶豫未決有賈雄者曉陰陽占候言無不用密深結之使託術數以說讓讓果以密言問之對曰吉不可言然公自立恐未必成若立斯人事無不濟讓然之密因說讓曰今四海糜沸不得耕耘公士眾雖多食無倉廩唯資野掠常若不給若曠日持久加以大敵臨之必渙然離散未若先取滎陽休兵館穀待士馬肥充然後與人爭利讓從之於是攻滎陽諸縣多下之帝從張頡施為滎陽通守以討之讓卿數為頡施所敗聞其來大懼將避之密曰頡施勇而無謀兵又驟勝既驕且狠可一戰擒也分兵千餘人伏林間頡施方陳而前讓與戰不利頡施乘之逐北十餘里密發伏掩之頡施兵敗密與讓及徐世勣王伯當合軍圍之頡施戰死部兵號泣數日不止河南郡縣為之喪氣詔以裴仁基代領其眾從鎮虎牢讓乃令密建牙列統所部號蒲山公營密部分嚴整躬服儉素

所得金寶悉頒賜麾下由是人為之用然麾下多為讓士卒所陵辱亦不敢報也讓謂密曰今資糧粗足意欲還向瓦崗公若不往唯公所適讓從此別矣乃帥輜重東引密亦西行至康城說下數城大獲資儲讓尋悔之復集覽離狐括地志云離狐故城在曹州引兵從密王者不死王去聲大元經曰五行

用事者王言其人有王氣未必能殺之也斯人再三獲濟斯人謂李密也初楊玄感兵敗密被執以計亡

去聚徒教授郡縣捕之又亡抵王秀才家帝令捕之值出獲免凡再三皆不得死館穀因其軍之館食其

軍之穀也左傳僖二十八年楚師敗績晉師三日館穀注館舍也食楚軍之穀三日建牙注見漢獻帝初

平三年牙門正誤王者不死今質實雍丘縣名注見漢桓

牙門按王如字帝廵燹四年游俠注見漢桓

北在大名府滑縣東南五十里離狐漢之縣名屬濟陽郡隋因之唐改為南華縣屬曹州金省之故城在兗州府曹縣界內徐世勣唐武德初賜姓李氏附宗正籍屬東都注見漢光武建武八年汴水原自開封府界急流過蕭縣至徐州城東北與泗水通蘇軾詩汴泗交流處清潭百丈深外黃縣名注見漢靈帝建寧二年濟陽縣名注見漢元帝永光四年劉項謂劉邦項羽揚越二州名揚注見漢武帝元朔五年淮南越注見漢和帝永元元年會稽宗城縣名注見漢後主延熙十八年漢沔二水名注見漢獻帝建安十二年猶豫注見漢光武建武六年通守官名漢謂之別駕隋謂之治中唐謂之通守又謂之贊治宋謂之通判今因之云迓北注見周赧王三十一年虎牢縣名注見晉帝奕太和四年麾下注見漢獻帝建安十四年瓦崗未詳處所

康城未詳沿革

十二月鄱陽林士弘稱楚帝據江南

鄱陽賊帥操師乞自稱元興王攻陷豫章郡以其鄉人林士弘為大將軍詔治書侍御史劉子翊將兵討殺之士弘代統其眾與子翊戰殺子翊兵遂大振至十餘萬人自稱皇帝國號楚建元太平豪傑爭殺隋守令以郡縣應之北自九江南及番禺皆為所有

質實

鄱陽郡名注見梁武帝太清二年豫章郡

注見漢武帝元鼎五年劉子翊彭城人九江郡名注見晉明帝太寧二年潯陽番禺縣名注見漢高帝十一年

以李淵為太原留守擊甄翟兒破之

詔以李淵為太原留守以郎將王威高君雅為之副將兵討甄翟兒遇於雀鼠谷淵眾纔數千賊圍數匝

李世民將精兵救之拔淵於萬集覽雀鼠谷在西河

衆之中會步兵至合擊大破之郡界中其地險

固按西河今太原府汾州是質實一統志云雀鼠谷在汾州介休

蔡王智積卒

帝疎薄骨肉智積每不自安及病不呼醫臨終集覽

謂所親曰吾今日始知得保首領沒於地矣得保首領沒於地矣

公疾名孔父曰寡人得保首領以沒云云謂我得保全首領而善終也

太僕楊義臣擊張金稱高士達斬之竇建德收其衆取

饒陽詔罷義臣兵

羣盜寇掠河北屠陷郡縣隋將帥敗亡相繼惟虎賁中郎將王辯清河郡丞楊善會數有功善會前後七百餘戰未嘗負敗至是太僕楊義臣討張金稱義臣引兵據永濟渠為營去金稱營四十里深溝高壘不與戰金稱日引兵至義臣勒兵環甲約與之戰既而不出如是月餘金稱以為怯屢逼其營詈辱之義臣乃謂曰汝明旦來我當必戰金稱易之不復設備義臣簡精騎二十夜自館陶濟河伺金稱離營即入擊其累重金稱引還義臣從後擊之金稱大敗與左右逃於清河之東月餘楊善會擒殺之詔以善會為清河通守時涿郡通守郭絢將兵討高士達士達自以才畧不及竇建德乃進建德為軍司馬悉以兵授之建德請士達守輜重自簡精兵拒絢詐為與士達有隙而叛遣人請降於絢願為前驅自効絢引兵隨之

至長河建德襲之殺數千人斬絢首張金稱餘衆皆歸建德楊義臣乘勝欲討之建德謂士達曰歷觀隋將善用兵者無如義臣今滅張金稱而來其鋒不可當請引兵避之使其欲戰不得坐費歲月將士疲倦然後乘間擊之乃可破也不然恐非公之敵士達不從留建德守營自帥精兵逆擊義臣戰小勝因縱酒高宴建德聞之曰東海公未能破敵遽自矜大禍至不久矣後五日義臣大破士達斬之其兵皆潰建德與百餘騎亡去至饒陽乘其無備攻陷之其兵得三十餘人義臣以為建德不足憂引去建德還平原收散兵塋死者為士達發喪軍復大振自稱將軍先是群盜得隋官及士族子弟皆殺之獨建德善遇之由是隋官稍以城降之聲勢日盛勝兵至十餘萬人內史郎虞世基以帝惡聞盜賊諸將有告賊求救者皆不以聞或杖其使者以為妄言由是盜賊徧海內帝皆弗之知楊義臣破降河北賊數十萬列狀上聞帝

歎曰我初不聞賊頓如此義臣降賊何多也世基對曰小竊雖多未足為慮義臣克之擁兵不少久在闕外此最非宜帝曰卿言是也遽追義臣放散其兵賊由是復盛治書侍御史韋雲起劾奏世基及御史大夫裴蘊職典樞要四方告變不為奏聞賊多言少致發兵不多徃皆不克故使官軍失利賊黨日滋請付有司詰正其罪大理卿鄭善果奏雲起言不實左遷大理司直

集覽

累重累謂妻子重謂鞫重也

質實

清河郡注見漢安帝建光元年甘陵楊善會華陰人館陶縣名注見晉孝武帝太元九年長沙

郡名注見漢獻帝興平元年饒陽縣名注見漢帝立更始二年涿郡注同上年虎賁中郎注見新莽地皇二年永濟渠注見大業三年平原郡名注見陳宣帝太建八年安德東海郡名注見秦二世二年郟左遷注見唐憲宗元和七年鞫重注見周顯王三十六年

帝至江都

帝至江都江淮郡官謁見者專問禮餉豐薄豐則起
遷薄則停解江都郡丞王世克獻銅鏡屏風遷通守
歷陽郡丞趙元楷獻異味遷江都郡丞由是郡縣競
務刻剝以克貢獻民外爲盜賊所掠內爲郡縣所賦
生計無遺加之饑饉民始采樹皮葉或持藁糞土而
食之諸物皆盡乃自相食而官倉猶充牣吏皆畏法
莫敢賑救王世克密爲帝簡閱江
淮民間美女獻之由是益有寵
質實 歷陽郡注見
元年饑饉朱子曰穀不熟曰饑菜不
熟曰饉充牣注見宋明帝泰始元年

遣江都通守王世克擊河間格謙斬之謙黨高開道收

其衆掠燕地

謙擁衆十餘萬據豆子航自稱燕王帝命王世充將兵討斬之謙將高開道收餘衆寇掠燕地軍勢復振

質實

河間郡名注見漢帝立更始二年寇掠注見恭帝皇泰二年抄掠

虎賁即將羅藝起兵涿郡

初帝謀伐高麗器械資儲皆積於涿郡又臨朔宮多珍寶諸賊競來侵掠留守官不能拒唯虎賁郎將羅藝獨出戰前後破賊甚衆將作亂先宣言以激其衆曰吾輩討賊數有功城中倉庫山積制在留守之官而莫肯散施以濟貧乏將何以勸將士衆皆憤怒軍還郡丞出城候藝藝因執之陳兵而入發庫物以賜戰士開倉廩以賑貧乏境內咸悅殺渤海太守唐祿等數人柳城懷遠並歸之藝自稱幽州總管改柳城郡爲營州以質實渤海郡名注見晉穆帝永和六年鄧島爲總管質實滄州柳城縣名注見漢獻帝建安

十二年幽州注見唐高祖武德四年營州注
見晉武帝太康三年懷遠鎮名未詳處所

詔李淵擊突厥

突厥數寇北邊詔李淵與馬邑太守王仁恭擊之時
突厥方彊兩軍不滿五千淵選善騎射者二千人使
之飲食舍止一如突厥或與突質實馬邑郡名注見
厥遇則伺便擊之前後屢捷漢高帝六年突

厥北狄種名注見梁武帝大同十一年

丁丑十三年恭帝侑義寧元年長樂王實建德丁丑元
魏公李密元定楊可汗劉武周天興元梁王

梁師都永隆元秦主薛舉秦興元梁春正月陳稜討杜
王蕭銑鳴鳳元是歲并楚凡八國

伏威敗績伏威遂據歷陽考異按九年書張須陁擊王
薄來護兒等擊楊元感

十二年書陳稜擊李子通李淵擊甄翟兒此年書王世充擊盧明月並不書討以群盜自相攻擊故也此書討誤傳

稜討杜伏威伏威帥衆拒之稜閉壁不戰伏威遣以婦人之服謂之陳姥稜怒出戰伏威奮擊大破之乘勝破高郵引兵據歷陽自稱總管以輔公柘為長史分遣諸將徇屬縣所至輒下江淮間小盜爭附之伏威常選敢死之士五千人謂之上募寵過甚厚有攻戰令先擊之戰罷閱視有傷在背者即殺之所獲資財皆以賞軍士有戰死者以妻妾殉葬故人自為戰所向無敵

集覽 殉葬注見唐太宗貞觀二十三年

質寶 一統志云高郵古邑名春秋時為吳邗溝地秦為高郵亭漢置高郵縣屬廣陵國晉屬臨淮郡宋屬廣陵郡隋屬江都郡唐屬揚州宋開寶中以縣置高郵軍後罷軍縣屬揚州元祐中復置軍建

炎中陞為承州紹興末復為軍元至元中置高郵路
後改為府屬揚州路至本朝初改為州以縣省入仍

屬揚州府歷陽縣名注

見漢冲帝永嘉元年

竇建德稱長樂王質實

長樂郡名注見秦二世二年信都

○魯郡徐圓

朗兵起

圓朗攻陷東平分兵畧地自琅邪以質實魯郡注見

西北至東平盡有之勝兵二萬餘人漢景帝三年濟南東平郡名注見漢獻帝興平元年琅邪郡名注見漢光武建武五年

盧明月掠河南遣王世充擊斬之

明月轉掠河南至於淮北眾號四十萬帝命王世充討之戰於南陽大破之斬明月餘眾皆散質實

廬明月涿郡人南陽縣名
注見周赧王十七年宛

二月馬邑校尉劉武周朔方即將梁師都各據郡起兵

馬邑太守王仁恭多受貨賂不能賑施郡人劉武周
驍勇喜任俠爲鷹揚府校尉仁恭甚親厚之令帥親
兵屯閣下武周與仁恭侍兒私通恐事泄謀亂先宣
言曰今百姓饑饉僵屍滿道王府君閉倉不賑卹豈
爲民父母之意乎衆皆憤怒武周稱疾卧家豪傑來
候問武周椎牛縱酒因大言曰壯士豈能坐待溝壑
今倉粟爛積誰能與我共取之豪傑皆許諾武周入
謁仁恭其黨隨入斬仁恭持其首出徇郡中無敢動
者於是開倉以賑饑民馳檄境內收兵得萬餘
人遣使附於突厥師都亦殺郡丞據郡附突厥
任俠注見漢帝立更始元年馳檄
馳奔走也檄注見楚義帝元年

翟讓李密據興洛倉擊敗東都兵讓推密稱魏公畧取

河南諸郡

李密說翟讓曰今東都空虛越王冲幼政令不一士
民離心段達元文都闇而無謀以僕料之彼非將軍
之敵若將軍能用僕計天下可指揮而定也乃遣其
黨覘東都虛實留守官司覺之始爲守備馳告江都
密曰事勢如此不可不發今百姓饑饉洛口倉多積
粟將軍若親行掩襲彼未能救取之如拾遺耳發粟
以賑窮乏遠近孰不歸附百萬之衆一朝可集枕威
養銳以逸待勞縱彼能來吾有備矣然後檄召四方
引賢豪而資計策選驍悍而授兵柄除亡隋之社稷
布將軍之政令豈不盛哉讓曰此英雄之畧非僕所
堪推君之命盡力從事於是密讓將精兵七千人出
陽城襲興洛倉開倉恣民所取老弱樞員相屬時德

叔以尉氏應密祖君彥住歸之君彥璉之子也博學強記文辭瞻敏薛道衡嘗薦之於高祖高祖曰是歌殺斛律明月人兒邪朕不須此輩帝即位尤疾其名調宿城令君彥恒鬱鬱思亂密得之喜引為上客越王侗遣即將劉長恭帥步騎一萬五千討密而使河南討捕使裴仁基等自汜水西入以掩其後時東都人皆以密為饑賊盜未烏合易破爭來應募衣服鮮華旗鼓甚盛陳於石子河西密讓選驍雄分為十隊令四隊伏嶺下以待仁基以六隊陳於石子河東長恭等見密兵少輕之讓先接戰不利密帥麾下橫衝之隋兵大敗死者什五六密讓威聲大振讓於是推密為主號魏公稱元年其文書行下稱行軍元帥府拜讓司徒單雄信徐世勳為大將軍各領所部房彥藻邴元真為長史祖君彥為記室於是趙魏以南江淮以北群盜莫不響應悉拜官爵使各領其眾置百營簿以領之眾至數十萬乃廣築洛口城周四十里

而居之遣彥藻將兵東畧地取安陸

集覽

歌殺斛律

汝南淮安濟陽河南郡縣多陷於密

北齊丞相斛律光字明月北周患之為謠言曰高山不推自崩榘木不扶自舉令間諜傳言於齊齊祖珽

欲陷光因續之曰盲老公背受大斧饒舌老母不得語齊主遂執光而殺之是祖珽歌殺之也君彥珽之子也

故云**質實**一統志云陽城古邑名禹避舜子於陽城即此漢置陽城崇高二縣屬潁川郡東漢

省崇高縣入陽城晉屬河南郡東魏析置堙陽縣改曰武林後又改曰嵩陽與陽城並屬河南郡隋因之

唐初屬嵩州尋改陽城曰告成嵩陽曰登封後又改告成曰陽邑五代周時省陽邑入登封宋金元仍舊

本朝因之改屬河南府襍負注見漢瑒帝延平元年尉氏縣名注見漢桓帝建和元年祖居彥范陽人宿城古邑名秦為須昌縣漢晉因之隋改宿城縣又別置須昌五代唐改曰須城自晉以來皆為郡附郭

本朝省之故址在兗州府東平州境魏縣名注見漢成帝綏和二年記室官名事物紀原云魏太祖所置以陳琳阮瑀為記室掾其官始見於魏武之世矣宋用晉制自明帝後皇子弟雖非都督亦置記室參軍則記室而為參軍晉官也宋朝亦置於諸王府曰某王府記室也洛口城在河南府鞏縣西南安陸郡名注見周世宗顯德五年汝南郡名注見漢光武建武十九年淮安郡名注見齊武帝永明五年濟陽郡名注見漢元帝永光四年河南郡名注見秦莊襄王元年三川

三月突厥立劉武周為定楊可汗取樓煩定襄鴈門諸郡

武周襲破樓煩郡進取汾陽宮獲隋宮人以賂突厥始畢可汗始畢以馬報之兵勢益振又攻陷定襄突

厥立武周為定楊可汗遺以狼頭纛武周即皇帝位
改元以衛士楊伏念為左僕射妹婿范君璋為內史
令引兵逼鴈門郡丞陳孝意悉力拒守乘間出擊武
周屢破之既而外無救援遣間使詣江都皆不報孝
意誓以必死旦暮向詔救庫俯伏流涕悲動

集覽

狼頭

左右百餘日食盡校尉張倫殺孝意以降

纛注見陳宣帝

樓煩郡注見周赧王八年定襄
太建十三年 質實 郡名注見晉懷帝永嘉六年定

楊可汗定楊郡名注見陳宣帝太建十一年
可汗夷狄君長之號注見漢後主景耀四年

梁師都取雕陰弘化延安等郡自稱梁帝引突厥寇邊

師都畧定雕陰宏化延安等郡遂即皇帝位國號梁
始畢遺以狼頭纛號為大度毘伽可汗師都乃引突
厥居河南之地 質實 雕陰郡名注見周顯王三十五
攻破鹽川郡 年宏化郡名注同上四十年

義渠延安郡名注見梁武帝普通六年鹽川郡未詳
沿革唯鞏昌府漳縣西南五里有鹽川寨乃趙宋所
置後改為鎮未知
是否明者察之

流人郭子和起兵榆林突厥以為屋利設

朔衛郭子和生事徙榆林會郡中大饑子和潛結敢
死士十八人執郡丞數以不恤百姓斬之開倉賑施
自稱永樂王有二千餘騎南連梁師都北附突厥始
畢以劉武周為定楊天子梁師都為解事天子子和
為平陽天子子和固辭不
敢當乃更以為屋利設

集覽

屋利設突厥俗謂別
部典兵者曰設屋利

乃一設
之號

質實

榆林郡名注見文帝開皇十九年勝一
統志云永樂本漢北平縣地名屬中山

國後魏析置永樂縣及置樂浪郡北齊屬黎郡隋初
罷郡以縣屬易州唐天寶初改為蒲城縣五代晉時

徙秦州治此後省入清苑縣金復析置蒲城縣元仍舊至今朝初因之改屬保定府

夏四月金城校尉薛舉起兵隴西自稱西秦霸王

舉驍勇絕倫家貲巨萬交結豪傑雄於西邊為金城府校尉時隴右盜起金城令郝瑗募兵得數千人使舉將而討之方授甲置酒饗士舉與其子仁杲及同黨十三人於座劫瑗發兵開倉賑施自稱西秦霸王招集群盜掠官牧馬賊帥宗羅暉帥眾歸之選精銳克袍罕岷山羗酋鍾利俗擁眾二萬歸之舉兵大振以仁杲為齊王領東道行軍元帥少子仁越為晉王兼河州刺史羅暉為興王以副仁杲未幾盡得隴西之地眾至 **質實** 金城郡名注見唐太宗貞觀十八年十三萬 蘭州隴西郡名注見漢後主建興六年 年南安袍罕縣名注見晉穆帝永和元年一統志云岷山在陝西岷州衛城北山黑無樹木泚水經其下

相傳夏禹見長人受黑玉書於此齊州名注見漢景
帝三年濟南晉州名注見漢獻帝建安七年河東河
州注見晉穆帝永和元年興
州名注見晉懷帝永嘉四年

河南討捕使裴仁基以虎牢降李密密攻東都入其郭

李密以孟讓爲總管使夜帥步騎入東都外郭燒掠
於是東都居民悉遷入宮城鞏縣長柴孝和監察御
史鄭頊以城降李密密以孝和爲護軍頊爲長史裴
仁基每破賊得軍資悉以賞士卒監軍御史蕭懷靜
不許屢求仁基長短劾奏之倉城之戰仁基失期不
至恐獲罪李密使人說之賈閏甫勸仁基降密仁基
曰如蕭御史何閏甫曰蕭君如栖上鷄若不知機變
在明公一刀耳仁基從之遣閏甫詣密請降密大喜
以閏甫爲參軍使之復命仁基還屯虎牢蕭懷靜密
表其事仁基知之遂殺懷靜帥其衆以虎牢降密密

以仁基爲上柱國仁基子行儼驍勇善戰密亦以爲上柱國密得秦叔寶及程咬金皆以爲驃騎咬金後更名知節羅士信趙仁基皆帥衆歸密密署爲總管使各統所部遣裴仁基孟讓帥二萬餘人襲回洛東倉破之遂燒天津橋縱兵大掠東都出兵擊之仁基等敗走密自帥衆屯回洛倉攻偃師金墉皆不克還洛口東都城內乏糧而布帛山積至然布以熒越王侗使人運回洛倉米入城遣兵屯豐都市上春門北邙山爲九營以備密汝陰淮陽降密密復據回洛倉段達等出兵拒之敗走密遂移檄郡縣數帝十罪且曰罄南山之竹書罪無窮決東海之波流惡難盡祖君考之辭也越王侗遣太常丞元善達問行詣江都奏曰李密圖逼東都城內無食若陛下速還烏合必散不然者東都決沒因歎欬嗚咽帝爲之改容虞世基進曰越王年少此輩誑之若如所言善達何緣來至帝乃怒曰善達小人敢廷辱我因使向東陽催運

善達遂為群盜所殺是後人莫敢以賊聞世基容貌沈審言多合意特為帝所親愛鬻官賣獄其門如市朝野共疾怨之舍人封德奭託附世基以世基不開吏務密為指畫諂順帝意表疏忤旨者皆屏而不奏鞫獄多峻文深詆行賞則抑削就薄故世基之寵日隆而隋政益衰皆德奭所為也

集覽 頤他領反

駸五巧反峻文深詆注見漢成帝永始二年

質實

鞏縣注見漢王邦三年程駸金濟州東何人一

統志云天津橋在河南府城外西南架洛水隋煬帝建用大船連以鐵鎖南北夾起四樓唐貞觀中始焚石為岸即宋郟雍開杜鵑處偃師縣名注見唐肅宗至德二年金墉城名注見魏元帝咸熙二年北印山

注見漢靈帝中平六年汝陰郡名注見梁武帝天監三年潁川淮陽郡名注見周赧王三十七年陳國獻欵注見漢光武建武元年東陽郡名注見晉哀帝興寧三年回洛東倉未詳處所江都縣名注見漢獻帝

興平元年

五月李淵起兵太原殺副留守王威高君雅

初淵娶於神武肅公竇殺生四男建成世民玄霸元吉一女適太子千牛備身臨汾柴紹世民聰明勇決識量過人見隋室方亂陰有安天下之志傾身下士散財結客咸得其歡心娶長孫晟女晟族弟右勳衛順德與右勳侍劉弘基皆避遼東之役亡命晉陽與世民善左親衛竇琮亦亡命太原素與世民有隙世民加意待之琮意乃安晉陽宮監裴寂晉陽令劉文靜相與同宿見城上烽火寂嘆曰貧賤如此復逢亂離何以自存文靜笑曰時事可知吾二人相得何憂貧賤文靜見李世民而異之深自結納謂寂曰此人雖少命世才也寂初未然之文靜坐與李密連昏繫獄世民就省之文靜曰天下大亂非高光之才不能

定也世民曰安知其無但人不識耳我來相省非兒女之情欲與君議大事也計將安出文靜曰今主上南巡江淮李密圍逼東都羣盜殆以萬數當此之際有真主驅駕而用之取天下如反掌耳太原百姓皆避盜入城文靜爲令數年知其豪傑一旦收集可得十萬人尊公所將之兵復且數萬一言出口誰敢不從以此乘虛入關號令天下不過半年帝業成矣世民笑曰君言正合吾意乃陰部署賓客淵不之知也世民恐淵不從久不敢言淵與裴寂有舊每相與宴語或連日夜文靜欲因寂闕說乃引寂與世民交世民出私錢數百萬與寂博稍以輸之寂大喜由是歛狎世民乃以其謀告之寂許諾會突厥寇馬邑淵遣高君雅將兵與王仁恭拒之不利恐并獲罪甚憂之世民乘間屏人說淵曰今主上無道百姓困窮晉陽城外皆爲戰場大人若守小節下有盜寇上有嚴刑危亡無日不若順民心興義兵轉禍爲福此天授之

時也淵大驚曰汝安得爲此言吾今執汝以告縣官
世氏徐曰世民親天時人事如此故敢發言必欲執
告不敢辭死淵曰吾豈忍告汝汝慎勿出口明日世
民復說淵曰人皆傳李氏當應圖讖故李金才無罪
一朝族滅大人設能盡賊則功高不賞身益危矣惟
昨日之言可以救禍此萬全之策也願大人勿疑淵
乃歎曰吾一夕思汝言亦大有理今日破家亡軀亦
由汝化家爲國亦由汝矣先是裴寂私以晉陽宮人
侍淵至是淵從寂飲酒酣寂從容言曰二郎陰養士
馬欲舉大事正爲寂以宮人侍公恐事覺并誅耳衆
情已協公意如何淵曰事已如此當復柰何正須從
之耳帝以淵與王仁恭不能禦寇遣使者執詣江都
淵大懼世民與寂等復說淵曰事已迫矣宜早定計
且晉陽士馬精彊宮監蓄積巨萬代王幼冲闕中豪
傑並起公若鼓行而西撫而有之如探囊中之物耳
奈何受單使之囚坐取夷滅乎淵然之密部勒將發

會帝遣使馳驛救淵及仁恭淵謀亦緩大理司直夏侯端謂淵曰今帝座不安參墟得歲必有真人起於其分非公而誰乎司馬許世緒司鎧武士韞前勳衛唐憲憲弟儉皆勸淵舉兵時建成元吉尚在河東故淵遷延未發劉文静謂裴寂曰先發制人後發制於人且公為宮監而以宮人侍客公死可爾何誤唐公也寂甚懼屢趣淵起兵淵乃使文静詐為敕書發太原西河鴈門馬邑民年二十已上為兵擊高麗由是人情怵怛思亂者眾及劉武周據汾陽宮世民言於淵曰大人為留守而盜賊竊據離宮不早建大計禍今至矣淵乃集將佐謂之曰武周據汾陽宮吾輩罪當族滅若之何王威等皆懼請計淵曰朝廷用兵皆稟節度今賊在數百里內江都在三千里外加以道路險要復有他賊據之以嬰城膠柱之兵當巨猾豕突之勢必不全矣進退維谷何為而可威等皆曰公地兼親賢同國休戚要在平賊專之可也淵陽若不

得已而從之者曰然則先當集兵乃命世民與劉文靜長孫順德劉弘基等各募兵遠近赴集旬日間近萬人仍密遣使召建成元吉於河東柴紹於長安王威高君雅見兵大集疑淵有異志謂武士護曰順德弘基皆背征三侍安得將兵欲收按之士護曰二人皆唐公客若爾必大致紛紜威等乃止威君雅欲因晉祠祈雨討淵五月淵使世民伏兵於晉陽宮城外且與威君雅共坐視事使劉文靜引晉陽府司馬劉政會入告威君雅潛引突厥入寇君雅攘袂大詬世民已布兵塞路文靜引與弘基順德等共執威君雅繫獄會突厥數萬眾寇晉陽淵命裴寂等勒兵為備而悉開諸城門突厥不敢進眾以為威君雅實台之也於是斬威君雅

集覽 適太子千牛備身臨汾柴紹適下嫁也爾雅曰如適以狗突厥大掠而去

之嫁注方言自家而出謂之適猶女出為嫁也千牛備身東宮官名掌執御刀以宿衛蓋取庖丁為文惠

君解數十牛而刃若發礪此刃可以備身因以名官
煬帝改左右備身爲左右驍衛其所領名豹騎柴紹
字嗣昌晉州臨汾縣人二郎李淵次子名世民帝座
紫微大帝之座也注見漢桓帝延熹二年參墟得歲
天官書參辰出曰長列昭昭有光利行兵正義曰星
經云參魏之分野益州也晉天文志參十星一名參
伐主斬刈事參墟得歲謂歲星在參分也又越得歲
注見晉帝奕太和五年士護獲鬱縛反以宮人侍容
寂嘗以晉陽宮人私侍李淵進退維谷詩桑柔篇文
注云谷窮也箋云前無明君却迫罪役是以進退皆
窮也

正誤 背征三侍今按背征謂出征而背叛逃亡者
三侍謂三侍中之人也隋制左右翊衛府有
親勳武三衛大業初改爲

質實 神武縣名注見宋明
三侍親侍勳侍武侍也 帝泰始五年平齊一

統志云臨汾漢之縣名屬河東郡三國魏置平陽郡
縣屬焉後魏兼置晉州於此隋改曰臨汾縣爲平河

郡治所後改郡曰臨汾唐分置西河縣尋省入臨汾屬晉州宋金元仍舊至本朝因之爲平陽府治所仍

屬焉晉陽縣名注見周威烈王二十三年太原郡名

注見齊明帝建武三年并州晉陽宮注見梁武帝大

同十一年裴寂蒲州桑泉人劉文靜京兆萬年人高

光謂漢高帝光武博奕棊也注見晉明帝太寧三年

蒲博圖識注見漢平帝元始三年夏侯端壽州人許

世緒并州人武士獲并州文水人唐憲并州晉陽人

河東郡名注見漢獻帝建安七年西河郡名注見周

威烈王二十三年鴈門郡名注見秦王政三年離宮

注見大業元年膠柱注見梁武帝太清元年劉政會涇州人長孫順德洛陽人

發明

唐公以義起兵大非羣盜之比而綱目一概書之何耶公儻能正名仗義若湯之伐桀若

武之伐紂若沛公之誅無道秦則綱目亦必有以處此矣惜乎兵以義名乃止於尊隋而不能爲討

賊之舉君子雖欲異之不可得也况又
淫汙宮掖設詐罔衆殺人以利己者乎

東都遣兵擊李密大破之密退屯洛口

帝命將軍龐玉郎將霍世舉將闕內兵援東都柴孝
和說李密曰秦地山川之固秦漢所憑以成王業者
也今不若使翟司徒守洛口裴柱國守回洛明公自
簡精銳西襲長安然後東向以平河洛傳檄而天下
定矣不早爲之必有先我者悔之無及密曰此誠上
策但昏主尚存從兵猶衆我兵皆山東人誰肯從我
西入諸將出於羣盜留之各競雌雄如此則大業隳
矣孝和曰然則僕請間行覲覈密許之孝和與數十
騎至陝縣山賊歸之者萬餘人會密爲流矢所中卧
營中越王侗使段達與龐玉等夜出兵與戰大破之
密乃棄回洛奔洛口孝和衆散輕騎
質實一統志云
歸密密以鄭頽鄭乾象爲左右司馬
洛口地名

在河南府城東一百三十里鞏縣西隋煬帝聚米置倉於此號曰洛口倉河洛二水名河注見梁武帝天

監十五年洛注見漢高后三年

陝縣注見周顯王四十五年

六月李淵遣使如突厥

李建成李元吉棄其弟智雲於河東而去吏執送長安殺之六月建成元吉與柴紹偕至晉陽劉文静勸

李淵與突厥相結資其士馬以蓋兵勢淵從之自為手啟卑辭厚禮遺始畢可汗云欲舉義兵迎主上復

與突厥和親若能與我俱南願勿暴掠百姓若但和親坐受寶貨亦唯可汗所擇始畢得啟謂其大臣曰

隋主為人我所知也若迎以來必害唐公而擊我無疑矣苟唐公自為天子我當以兵馬助之即命以此

意為復書使者七日而反將佐皆喜請從突厥之言淵不可曰諸君宜更思其次寂等乃請尊天子為太

上皇立代王爲帝以安隋室移檄郡縣改易旗幟雜用絳白以示突厥淵曰此可謂掩耳盜鈴然逼於時事不得不爾乃許之質實晉陽縣名注見周遣使以此告突厥威烈王二十三年

李淵遣世子建成及世民擊西河郡拔之斬郡丞高德

儒

西河郡不從淵命淵使建成世民將兵擊之時軍士新集咸未閱習建成世民與之同甘苦遇敵則以身先之近道菜菓非買不食軍士有竊之者輒求其主償之亦不詰竊者兵民皆悅至西河城下郡丞高德儒閉城拒守攻拔之執德儒至軍門世民數之曰汝指野鳥爲鷹以欺人主取高官吾興義兵正爲誅佞人耳遂斬之自餘不戮一人秋毫無犯各慰撫使復業遠近聞之大悅建成等引兵還晉陽往返凡九日

淵喜曰以此行兵雖橫行天下可也遂定入關之計

李淵自稱大將軍開府置官屬

淵開倉以賑貧民應募者日益多淵命爲三軍分左右通謂之義士裴寂等上淵號爲大將軍淵以寂爲長史劉文静爲司馬唐儉温大雅爲記室大雅仍以弟大有共掌機密武士獲爲鎧曹劉文會及崔善爲張道源爲戶曹姜暮爲司功參軍殷開山爲府掾長孫順德劉宏基竇琮王長諧善寶誼陽屯爲左右統軍自餘文武隨才授任以世子建成爲隴西公左領軍大都督左三統軍隸馬世民爲敦煌公右領軍大都督右三統軍隸馬各置官屬

集覽 陽屯姓
以柴紹爲右領軍府長史諮議

晉陽人温大雅太原祁人殷開山京兆鄜人崔善爲并州人張道源汝人敦煌郡名注見漢武帝元朔三

年隴西郡名注
見秦王政三年

李密復取回洛倉

李密復帥衆向東都大戰於平樂園密左騎右步中
列彊弩鳴千鼓以衝之東都兵大敗密復取回洛倉

質實

平樂園未詳處所東都注
見秦莊襄王元年三川

突厥遣使至太原李淵遣劉文靜報之

突厥遣其柱國康鞘利等送馬千匹詣李淵爲互市
許發兵送淵入關淵拜受書擇其馬之善者止市其
半義士請以私錢市其餘淵曰虜饒馬而貪利其來
將不已恐汝不能市也吾所以少取者示貧且不以
爲急故爾當爲汝賞之不足爲汝費也淵命劉文靜
使於突厥以請兵私謂文靜曰胡騎入中國生民之

大蠹也吾所以欲得之者恐劉武周引之共爲邊患又胡馬行牧不費芻粟聊欲藉之以爲聲勢耳數百人之外無集覽鞞利名也鞞音肖或音稍所用之

秋七月李淵引兵至霍邑代王侑遣即將宋老生將軍

屈突通將兵拒之

李淵以子元吉爲太原太守留守晉陽官帥甲士三萬發晉陽普衆移檄諭以尊立代王之意西突厥阿史那大柰亦帥其衆以從淵至西河慰勞吏民賑贍民乏民年七十以上皆除散官其餘豪傑隨才授任一日除千餘人至賈胡堡去霍邑五十餘里代王侑遣郎將宋老生帥精兵二萬屯霍邑大將軍屈突通將驍果數萬屯河東以拒淵會積雨淵不能進劉文静至突厥見始畢可汗請兵且與之約曰若入長安

民衆土地入唐公金玉繒帛歸突厥始畢大喜淵以書招李密密自恃兵彊欲為盟主復書曰所望左提右挈戮力同心執子嬰於咸陽殪高辛於牧野淵得書笑曰密方自矜大非折簡所致吾方有事關中若遽絕之乃是更生一敵不如卑辭推獎以驕其志使為我塞成臯之道綴東都之兵我得專意西征俟關中平定據險養威徐觀蚌鷸之勢以收漁人之功未為晚也乃復書曰天生烝民必有司牧當今為牧非子而誰老夫年逾知命願不及此欣戴大弟攀鱗附翼唯弟早膺圖籙以寧兆民宗盟之長屬籍見容復封於唐斯榮足矣密得書甚喜以示將佐曰唐公見推天下不足定矣自是信使往來不絕雨久不止淵軍中糧乏劉文静未返或傳突厥與劉武周乘虛襲晉陽淵欲北還裴寂等亦以為隋兵尚彊未易猝下李密姦謀難測武周惟利是視不如還救根本更圖後舉李世民曰今未菽被野何憂乏糧老生輕躁一

戰可擒李密顧戀倉粟未遑遠畧武周與突厥外雖相附內實相猜武周雖遠利太原豈可近忘馬邑卒興大義奮不顧身以救蒼生當先入咸陽號令天下今遇小敵遽已班師恐從義之徒一朝解體還守太原一城之地為賊耳何以自全建成亦以為然淵不聽促令引發世民將復入諫會淵已寢不得入號哭於外聲聞帳中淵名問之世民曰今兵以義動進戰則克退還則散衆散於前敵乘於後死亡無日何得不悲淵乃悟曰軍已發奈何世民曰右軍嚴而未發左軍去亦未遠請自追之淵笑曰吾之成敗皆在爾惟爾所為世民乃與建成分道夜追左軍復還既而太原運糧亦至胡氏曰武王伐商數紂之罪則多矣場皆有之而弑父弑兄則紂之所未有其當討無疑矣李淵聲其大逆不道之罪而舉兵討之則雖德非成湯亦無愧於自亮之載世民不必用宮人私侍以劫父也不必詐為救書發民以鼓怨也不必稱臣突

厥也不必尊江都而立代王也不必推獎李家以驕其志也堅守晉陽執召豪傑厚集其衆分擊二京義聲既震群盜自下乃遣良將總統師南指揚州則不逾旬時罪人斯得天下歸唐其孰能禦之惜乎世民有安天下之志才足以撥亂而無湯武反身之學劉文靜智謀之士耳裴寂又出其下故雖乘時舉事不旋踵成功而用智術遠義理者多矣

集覽 阿史那大奈名也奈音乃箇反字不從木霍邑漢彘縣也後漢改永安縣隋改霍邑本春秋霍伯國今霍州有霍邑屬平陽執子嬰於咸陽秦二世兄子公子嬰也立為秦王後沛公入咸陽子嬰降軹道旁乃以屬吏殪商辛於牧野殪於計反殺死也商帝辛天下謂之紂周武王伐之紂距之牧野武王斬之徐觀蚌鵠之勢以收漁人之功蚌部項反蛤也鵠允律反知天將雨烏也戰國策趙伐燕蘇代為燕謂趙惠文王曰今者臣來過易水蚌方出曝

而鵠啄其肉蚌合而柑其喙鵠謂蚌曰今日不雨明日不雨必有蚌脯蚌亦謂鵠曰今日不出明日不出必有死鵠蚌鵠不肯相舍漁人得而并擒之今趙且伐燕燕趙久相支以敵大衆臣恐彊秦之為漁父也自亳之載載始也成湯始脩德於亳也載一作實實一統本作哉書伊訓曰造攻自鳴條朕哉自亳志云霍邑即禹貢岳陽地漢為彘縣屬河東郡東漢改為永安縣魏晉屬平陽郡後魏初省後復置并置永安郡隋初罷郡置汾州又改呂州并改縣曰霍邑以霍山為名大業初州罷以縣屬臨汾郡義寧初置霍山郡唐罷郡置呂州貞觀中州罷以縣屬晉州宋屬平陽府金陞為霍州元仍舊至本朝初以霍邑縣省入改屬平陽府折簡注見梁元帝承聖元年關中注見唐元中開元十一年京兆成臯縣名注見秦莊襄王元年琴鱗附翼耿純之言事在漢光武建武元年咸陽縣名注見周顯王十九年

武威司馬李軌起兵河西自稱涼王

軌家富任俠薛舉起兵金城軌與同郡曹珍蘭謹梁
碩李贇安脩仁等誅曰薛舉必來侵暴郡官庸怯勢
不能禦吾輩豈可束手并妻孥為人所虜邪不若相
與并力拒之保據河右以待天下之變衆皆以為然
欲推一人為主各相讓莫肯當曹珍曰久聞圖讖李
氏當王今軌在謀中乃天命也遂相與拜軌奉以為
主軌乃令脩仁集諸胡自結民間豪傑共起兵稱河
西大涼王置官屬關謹等欲盡殺隋官分其家貲軌
曰今興義兵以救生民乃殺人取貨此群盜耳將何
以濟乃止薛舉遣其將常仲興濟河擊軌與軌將李
贇戰於昌松仲興舉兵敗沒軌欲縱遣之贇曰力戰
獲俘復縱以資敵將馬用之不如盡阮之軌曰天若
祚我當擒其主此屬終為我有若其無成留此何益
乃縱之未幾攻張掖敦煌西平枹罕皆克之盡有河

西五郡 質實 武威郡名注見唐中宗景龍二年李軌之地 涼州人金城郡名注見唐太宗貞觀十

八年河西郡名注見漢安帝元初元年昌松地名未詳處所西平郡名注見漢宣帝元康四年

薛舉自稱秦帝徙據天水

薛舉稱帝立仁果為太子遣仁果將兵取天水徙都之仁果多力善騎射軍中號萬人敵然性貪而好殺其克天水悉召富人倒懸之以醋灌鼻責其金寶舉每戒之曰汝之才畧足以辦事然苛虐無恩終當覆我國 質實 薛舉蘭州金城人天水郡名注見漢光武建武元年

詔詠郡留守薛世雄擊李密竇建德襲破之遂圍河間

詔詠郡留守薛世雄將燕地精兵三萬討李密命王世充等諸將皆受節度所過盜賊隨便誅剪世雄行

至河間軍於七里井竇建德士衆惶懼悉拔諸城南
遁聲言還入豆子航世雄以為畏已不復設備建德
謀還襲之其處去世雄營百四十里建德帥敢死士
二百八十人先行令餘衆續發約曰夜至則擊其營
已明則降之未至二里所天欲明建德惶惑議降會
天大霧咫尺不辨建德喜曰天贊我也遂突入其營
擊之士卒大亂世雄遁歸涿郡
慙恚發病卒建德遂圍河間 質實 涿郡注見漢帝
元更始二年河
間郡名注見同上年
七里井未詳處所

八月李淵與宋老生戰斬之遂取霍邑

八月雨霽李淵起霍邑淵恐宋老生不出建成世民
曰老生勇而無謀以輕騎挑之理無不出脫其固守
則誣以貳於我彼恐為左右所奏安敢不出淵然之
乃與數百騎先至霍邑城東數里以待步兵使建成

世民將數十騎至城下舉鞭指麾若將圍城之狀且
詬之老生怒引兵三萬分道而出淵使殷開山趣召
後軍後軍至淵欲使軍士先食而戰世民曰時不可
失淵乃與建成陳於城東世民陳於城南淵建成戰
小却世民與軍頭段志玄自南原引兵馳下衝老生
陳出其背老生兵敗投墜劉弘基就斬之僵屍數里
日已暮淵即命登城時無攻具將士肉薄而登遂克
之及行賞軍吏疑奴應募者不得與良人同淵曰矢
石之間不辨貴賤論勲之際何有等差宜並從本勲
授引見霍邑吏民勞賞如西河選其壯丁使從軍關
中軍士欲歸者並授五品散官遣歸或諫以官太濫
淵曰隋氏吝惜勲賞此所以失人心也柰何效之且
收衆以官不集覽脫其脫僅或之辭肉薄注
勝於用兵乎集覽見晉安帝義熙十三年
元臨淄人西河郡名注見周威烈
王二十三年南原地名未詳處所

李淵克臨汾絳郡劉文靜以突厥兵至遂下韓城

李淵入臨汾絳郡通守陳叔達拒守進攻克之叔達陳高宗之子有才學淵禮而用之至龍門劉文靜康鞘利以突厥兵五百人馬二千匹來至淵喜其來緩謂文靜曰吾西行及河突厥始至兵少馬多皆君將命之功也汾陽薛大鼎說淵請勿攻河東自龍門直濟河據永豐倉傳檄遠近關中可生取也淵將從之諸將請先攻河東河東縣戶曹任瓌說淵曰關中豪傑皆企踵以待義兵瓌在馮翊積年知其豪傑請往諭之必從風而靡義師自梁山濟河指韓城逼邵陽蕭造文吏必望塵請服孫華之徒皆當遠迎然後鼓行而進直據永豐雖未得長安關中固已定矣淵說時關內群盜孫華最彊淵至汾陰以書招之華來見淵淵慰獎之以任瓌為招慰大使瓌說韓城下之淵謂王長詣等曰屈突通精兵不少相去五十餘里不

敢來戰足明其衆不為之用然通畏罪不敢不出若自濟河擊卿等則我進攻河東必不能守若全軍守城則卿等絕其河梁前扼其喉

集覽

臨汾縣屬晉州按晉州今平陽

後拊其背彼不走必為擒矣

是括地志云臨汾故城在絳州正平縣東北絳郡注見漢獻帝建安七年汾陽縣屬太原在汾水之北今汾州是古西河也梁山注見晉惠帝元康七年韓城縣屬同州按同州漢馮翊也郃陽郃昌閣反水名應劭曰郃陽縣漢屬馮翊古莘國也其女太似為周文王后詩所謂在郃之陽是也括地志云郃陽故城在同州河西縣南三十里

蕭造馮翊郡太守姓名質實

龍門縣名注見文帝仁壽三年汾陽縣名注見秦王政十五年任環合肥人馮翊郡名注見唐元宗開元十一年韓城縣名注見漢光武建武十年一統志云郃陽古莘國地名漢始置郃陽縣屬左馮翊以在郃水之陽故名後周屬澄

城郡隋屬馮翊郡唐初屬西韓州貞觀中州罷屬同州五代梁屬河中府唐復舊宋復屬同州以夏陽縣省入金屬潁州後復屬同州元初屬潁州後仍舊至本朝因之改屬西安府汾陰縣名注見周顯王四十年

書法

漢高之篇書北貉燕人致泉騎助漢此其不書致助何借兵也然則何以不書借兵前書

遣使如突厥繼書以劉文靜報之此書劉文靜以突厥兵至雖不直書借兵而借兵之意見矣綱目於唐事婉而不隱終綱目書蠻夷借兵入其例有五致助入援順辭也徵兵發兵尊辭也遣使以其兵至敵辭也乞師卑辭也求救急辭也詳漢高帝四年

九月以江都婦女配將士

駭果在江都者多逃亡帝患之以問裴矩對曰人情非有匹偶難以久處請聽軍士於此納室帝從之悉召江都境內寡婦處女

集覽

處女孟子踰東家墻而

集宮下恣將士所取

樓其處子注處子處女

也莊子逍遙遊篇綽約若處子注處子

質實

江都縣名注見

漢獻帝興平元年駭果應劭曰武猛曰駭殺敵曰果

武陽郡降李密

武陽郡丞元寶藏以郡降李密密以為上柱國寶藏使其容鉅鹿魏徵為啟謝密且請改武陽為魏州又請帥所部西取魏郡南會諸將取黎陽倉密喜即以寶藏為魏州總管召徵掌記室徵少孤貧好讀書有大志落拓不事生業始為道士寶藏召典書記密愛其文辭故召之初貴鄉長魏德深為政清靜不嚴而

治遼東之役徵稅百端民不堪命唯貴鄉閭里不擾
有無相通不竭其力所求皆給元寶藏受詔捕賊數
調器械動以軍法從事其鄰城營造皆聚於聽事官
吏督責猶不能濟德深聽隨便修營惟戒吏以不煩
過勝餘縣使百姓勞苦然民各竭心常為諸縣之最
縣民愛之如父母寶藏害其能遣將千兵赴東都所
領兵聞寶藏降密思其親戚輒出都門東向慟哭而
返或勸之降密皆泣曰我與魏明府同來何忍棄去

集覽

落拓本傳作落魄按魏亦音拓落落魏
注見秦三世三年貴鄉縣名屬武陽郡注

質實

武陽郡注

見漢成帝綏和二年鉅鹿郡名注見漢靈帝中平元
年魏徵下曲陽人魏州注見漢成帝綏和二年魏郡
注見漢元帝建昭二年黎陽舍注見陳後主至德元
年貴鄉縣名注見新莽始建國三年元城魏德深鉅
鹿人遼東郡名注見秦王政三年
東郡注見秦莊襄王元年三川

李密遣徐世勣取黎陽倉

河南山東大水餓莩滿野詔開黎陽倉賑之吏不時
給死者日數萬人徐世勣言於李密曰天下大亂本
爲饑饉今更得黎陽倉大事濟矣密遣世勣帥麾下
五千人濟河會元寶藏郝孝德共襲破黎陽倉據城
開倉恣民就食決旬間得勝兵三十餘萬竇建德朱
粲之徒亦遣使附密泰山道士徐洪客獻書於密以
爲大衆久聚恐米盡人散師老厭戰難可成功勸密
乘進取之機因士馬之銳沿流東指直向江都執取
獨夫號今天下密壯其言以書招之洪客竟不出莫
知所之胡氏曰洪客之謀奇而正非惟李密不及唐
初諸人皆不及也天下未嘗無才或隱於屠販或寄
於盜賊洪客魏徵皆優游黃冠中而抱匡時之畧懷
濟世之具顧人不能知耳然李密不足與言豈洪客
未知晉陽興師或無路以自達而於密發之邪以此

一言觀之其胃中之奇固多矣而迄不自見豈其不及唐室之興而死歟抑如黃石公魯仲連之流歟嗚呼其可謂高士矣

集覽

黃冠野夫黃冠草服也黃石公漢張良遊下邳圯上遇一老人授一編書

曰後十三年孺子見我濟北穀城山下黃石即我矣孔文祥云黃石公鬚眉皆白杖丹絳履赤鳥葛推川云即老子也老子無世不出數易姓名出於黃帝時號廣成子周文王時號支邑先生武王時號郭叔子漢初號黃石公漢文時號河上公魯仲連戰國齊人遊於趙趙欲封之不受而去後齊攻燕聊城不下魯連乃為書約之矢以射城中遂取聊城齊欲爵之乃逃隱海上

質實

麾下注見漢獻帝建安十四年

泰山注見秦始皇二十八年河南注見宋主昱元徽元年山東注見宋文帝元嘉二十五年獨夫注見宋

王子業景和元年

馮翊太守蕭造降於李淵淵留兵圍河東自引軍西

時河東未下三輔豪傑至者日以千數淵欲引兵西趣長安猶豫未決裴寂曰屈突通擁大眾憑堅城吾捨之而去若進攻長安不克退為河東所踵腹背受敵此危道也不若先克河東然後西上李世民曰不然兵貴神速吾席累勝之威撫歸附之衆鼓行而西長安之人望風震駭智不及謀勇不及斷取之若振槁葉耳若淹留自弊於堅城之下彼得成謀修備以待我坐費日月衆心離沮則大事去矣且關中蜂起之將未有所屬不可不早招懷也屈突通自守虜耳不足為慮淵兩從之留諸將圍東都自引軍而西朝邑法曹靳孝謨以蒲津中渾二城降華陰令李孝常以永豐倉降京兆諸縣亦多遣使請降

集覽

朝邑今同州有朝邑按同州漢馮翊也蒲津臨晉關是注見秦始皇二十六年中渾注見陳宣帝大建七

年質實

三輔注見唐元宗開元十一年京兆蜂起注見秦二世二年一統志云朝邑古地名春秋

時為蒲關戰國魏築城於此漢為臨晉縣地晉為馮翊郡治此後魏分置南五泉縣西魏改為朝邑縣以據朝坂故名隋因之唐改為河西縣屬河中府大歷初復曰朝邑屬同州五代宋金元仍舊焉本朝因之改屬西安府華陽縣名注見周顯王三十七年陰晉京兆郡名注見唐元宗開元十一年

王世充救東都合擊李密於洛口

王世充等帥所領會東都越王侗使劉長恭龐玉等帥兵與世充等合擊李密於洛口詔諸軍皆受世充節度江都郡丞馮慈明向東都為密所獲密素聞其名延坐勞問禮意甚厚因謂曰隋祚已盡公能與孤共立大功乎慈明曰公家歷事先朝榮祿兼備不能善守門閥乃與玄感舉兵偶脫網羅得有今日唯圖

反噬未諭高音莽卓敦立非不彊盛一朝夷滅罪及
祖宗僕死而後已不敢開命密怒囚之慈明說防人
席務本使亡走奉表江都及致書東都論賊形勢至
雍丘為密將李公逸所獲密又義而釋之出至營門
翟讓殺之密之克洛口也箕山府即將張李珣固守
不下罵密極口密怒攻之不能克時密眾數十萬李
珣所領不過數百人而執志彌固誓以必死久之糧
盡水竭士卒羸病李珣撫循之一無離叛自三月至
於是月城遂陷李珣見密不肯拜

集覽

門闕注見梁
孝元帝承聖

元年莽卓敦元西漢王莽東漢董卓東晉
王敦桓元皆篡逆之臣防魯邑名屬兗州

質實

雍邱
縣名

注見漢桓帝延熹四年馮慈明信都人張李珣京兆
人箕山府未詳沿革箕山注見新莽始建國三年

李淵濟河遣建成守潼關世民徇渭北

李淵帥諸軍濟河關中士民歸之者如市淵遣世子
建成劉文靜帥王長諧等諸軍屯永豐倉守潼關以
備東方兵慰撫使竇執等受其節度世民帥劉弘基
等諸軍徇渭北慰撫使殷開山等受其節度冠氏長
子志寧安養尉顏師古及世民婦兄長孫無忌謁見
淵於長春宮志寧師古皆以文學知名無忌仍有才
畧淵皆禮而用之屈突通署郎將堯君素領河東通
守使守蒲坂自引兵數萬趣長安爲劉文靜所逼淵
遣其將呂紹宗等

集覽

冠氏長冠氏屬魏郡今大名府冠氏縣冠去聲長令長也

漢法縣萬戶以上置令以下爲長安養尉安養縣名屬襄州縣尉主檢覆巡捕質實實軌岐
人威兄子潼關注見漢獻帝建安十六年渭北注見
漢高帝五年渭水一統志云冠氏古邑名春秋屬晉
漢爲魏郡館陶縣地魏晉皆屬平陽郡隋析置冠氏
縣屬魏州大業初屬武陽郡唐初屬巨州後屬魏州

五代宋金並屬大名府元初屬東平路後陞爲冠州本朝初降爲縣改屬東昌府于志寧高陵人謹之曾孫安養縣名未詳沿革顏師古琅邪臨沂人淵三十七世孫長孫無忌洛陽人晟之子一絳志云長春宮在西安府朝邑縣治西北後周建隋文帝增廣之蒲坂縣名注見周赧王十二年堯君素魏郡人長安縣名注見漢惠帝五年通守官名注見大業十二年河東郡名注見漢獻帝建安七年

柴紹妻李氏及李神通段綸各起兵以應李淵關中羣

盜悉降於淵

柴紹之赴太原也謂其妻李氏曰尊公舉兵今偕行則不可留此則及禍奈何李氏曰君第速行我一婦人易以潛匿當自爲計紹遂行李氏歸鄠縣別墅散家貲聚徒衆淵從弟神通亦在長安亡入鄠縣山中

與長安大俠史萬寶等起兵以應淵西域高胡何潘
仁入司竹園爲盜有衆數萬劫李綱爲長史李氏使
其奴馬三寶說潘仁與之就神通合勢攻鄠縣下之
神通衆踰一萬以令狐德棻爲記室李氏又使馬三
寶說羣盜李仲文向善志丘師利等皆帥衆從之徇
盤厓武功始平皆下之衆至七萬左親衛段綸娶淵
女亦聚徒於藍田得萬餘人各遣使迎淵淵使柴紹
將數百騎並南山迎李氏闕中羣盜皆請降淵以書
慰勞使受**集覽**別墅墅上與反田廬也晉謝安園棊
世氏節度賭別墅大俠注見漢武帝元朔二年
任俠司竹園在鳳翔府盤厓縣令狐德棻令狐複姓
德棻名也令音零棻符分反盤厓縣名屬京兆今鳳
翔府盤厓縣山曲曰盤水曲曰厓因名焉盤張流反
厓陟栗反並南山並蒲浪反近也南山注見宋文帝
元嘉**正誤**並南山今按並**質實**鄠縣注見漢桓帝延
六年循傍去聲也熹七年西域外夷國

名注見漢哀帝元壽二年一統志云司竹原在西安府藍屋縣東周廻百里漢為鄠杜竹林故有司竹都尉隋唐皆置司竹監以掌之令狐德棻華原人藍屋縣名注見漢哀帝建平三年武功縣名注見漢後主建興十二年太原郡名注見齊明帝建武三年并州始平縣名注見楚義帝元年廢邱藍田縣名注見周赧王三年

書法

先李氏何壯其志也廣世盜不書盜此其書
摩盜何書降淵則不嫌於書盜矣終綱日書

婦人用兵二
洗氏李氏

冬十月李淵合諸軍圍長安

京兆內史衛文昇年老聞淵軍至憂懼成疾獨將軍
陰世師郡丞骨儀奉代王侑乘城拒守淵如永豐倉

勞軍賑饑民進屯馮翊世民所至吏民及羣盜歸之
如流世民收其豪俊以備僚屬營於涇陽勝兵九萬
李氏將精兵萬餘會世民於渭北與柴紹各置幕府
號娘子軍隰城尉房玄齡謁世民於軍門世民一見
如舊識署記室參軍引爲謀主玄齡罄竭心力知無
不爲淵命劉弘基殷開山分兵西畧扶風有衆六萬
南度渭水屯長安故城中出戰弘基逆擊破之世
民引兵趣司竹軍令嚴整秋毫不犯遣使白淵請期
日赴長安淵命建成選倉上精兵趣長樂宮世民帥
新附諸軍北屯長安故城延安上郡雕陰皆請降淵
引軍西行所過離宮園苑皆罷之出宮女還其親屬
十月至長安諸軍皆集合二十餘萬淵命各依壘壁
毋得入村落侵暴遣使至城下諭
質實 陰世師武威
衛文昇等不報命諸軍進圍城 人壽之子馮
瑀郡名注見唐元宗開元十一年同州涇陽縣名注
見周赧王四十九年幕府注見秦王政三年一統志

云隄城晉之縣名本漢滋氏縣地唐改爲西河縣
本朝省入汾州又注見周赧王三十年中陽房元齡
臨淄人彥謙之子扶風郡名注見周顯王八年岐渭
水注見漢高帝五年長安故城在西安府城西北二
十里本秦離宮漢高帝自櫟陽徙都於此惠帝城長
安周圍六十五里南爲南斗形北爲北斗形長樂宮
上郡注見秦王政三年雕陰縣名注見周顯王三十
年五

發明

興王氣象自與庸人不同李淵起兵至是終
半載方其拔西河斬佞臣慰撫居民秋毫不

犯義聲已昭布於遠近矣既而取霍邑克汾絳降
馮翊守潼關狗渭北兵威所至摧枯拉朽今乃大
合諸軍爲攻城之計未幾遂克長安雄據京邑是
豈四方諸寇所能抗衡者哉惟合綱目先後所書

而觀之則太宗之所以肇造
唐室者可謂帝王自有真矣

蕭銑起兵巴陵自稱梁王

巴陵校尉董景珍雷世猛旅帥鄭文秀徐德基張繡
等謀據郡叛隋推景珍為主景珍曰吾素寒賤不為
衆所服羅川令蕭銑梁室之後寬仁大度請奉之以
從衆望乃遣使報銑銑喜從之聲言討賊召募得數
千人銑嚴之孫也會潁川賊帥沈柳生寇羅川銑與
戰不利因謂其衆曰今天下皆叛隋政不行巴陵豪
傑起兵欲奉吾為主若從其請以號令江南可以中
興梁祚以此召柳生亦當從我矣衆皆悅聽命乃自
稱梁公改隋服色旗幟皆如梁舊柳生即帥衆歸之
銑以為車騎將軍起兵五日遠近歸附者至數萬人
遂向巴陵景珍遣徐德基帥郡中豪傑數百人出迎
柳生與其黨謀曰我先奉梁公勲居第一今巴陵諸

將皆位高兵多我若入城返出其下不如殺德基質
其首領獨挾梁公進取郡城則無出我右者矣遂殺
德基入白銑銑大驚曰今欲撥亂返正忽自相殺吾
不能為若主矣因步出軍門柳生大懼伏地請罪銑
責而赦之陳兵入城景珍言於銑曰徐德基建義功
臣而柳生無故擅殺之此而不誅何以為政且柳生
為盜日久今雖從義凶悖不移共處一城勢必為變
失今不取後悔何及銑又從之景珍收柳生斬之其
徒皆潰銑乃築壇燔燎音煩燎力台反燔燎
燔燎自稱梁王

集覽

燔燎音煩燎力台反燔燎所以祭天也天高不可達故

燔柴以祭之庶高烟上通也爾雅祭天曰質質寶巴陵縣名
燔柴馬融曰祭時積柴加牲其上而燔之

注見晉明帝咸和四年羅川縣名注見秦始皇三
十七年陽周潁川郡名注見漢光武建武八年

王世充及李密戰於洛北敗績

王世充營於黑石分兵守營自將精兵陳於洛北李
密引兵度洛逆戰大敗密帥精騎度洛南餘衆東走
月城世充追圍之密策馬直趣黑石營中懼連舉六
烽世充釋月城之圍狼狽自殺密還與戰大破之斬

首三千

質實

黑石疑是山名未詳處所一統志云洛
南縣名本春秋時晉上洛地漢爲上洛

縣地晉折置拒陽縣尋省後魏復置隋初屬商州尋
改曰洛南縣以在洛水之南故名唐宋金元俱仍舊
本朝初改爲華州隸西安府月城未
詳處所狼狽注見漢獻帝初平三年

十一月李淵克長安殺留守官陰世師等十餘人考異

按恩澤例曰凡更革皆書注云除秦苛法之類據分注
淵與民約法十二條悉除隋苛禁竊考漢王元年書沛
公入咸陽除秦苛法更始元年書大司馬秀至河北除
莽苛政晉大康元年書遣使行荆揚除吳苛政則此句

下漏除隋
苛禁四字

李淵命諸軍攻城約毋得犯七廟及代王宗室違者夷三族十一月克長安代王左右奔散唯侍讀姚思廉侍側軍士將登殿思廉厲聲訶之曰唐公舉義兵匡帝室卿等毋得無禮衆皆愕然布立庭下淵迎王於東宮遷居大興殿後聽思廉扶王至閣下泣拜而去淵還舍於長樂宮與民約法十二條悉除隋苛禁淵之起兵也留守官發其墳墓毀其五廟至是衛文昇已卒執陰世師骨儀等十餘人斬之餘無所問馬邑郡丞三原李靖素與淵有隙淵將斬之靖大呼曰公興義兵欲平暴亂乃以私怨殺壯士乎世民爲之固請乃捨之世民因召置幕府靖少員志氣有文武才畧其舅韓擒虎每撫之曰可與言將帥之畧者獨此子

集覽 後聽句絕注見晉愍帝建興二年廳事三耳 源李靖李靖京兆三原縣人也爲馬邑郡

丞
正誤

後聽今按聽即廳字
六朝以來乃始加广

質實

七廟注見宋明帝
泰始七年姚思廉

京兆萬年人察本之子東宮注見宋文帝元嘉
二十七年三源縣名注見晉孝武帝太元五年

書法

前書王威高君雅此書陰世師皆兵
官書殺綱目於唐事書法不隱如此

王世充與李密戰於石子河敗績

王世充堅壁不出越王侗遣使勞之世充慙懼請戰
與密夾石子河而陳密布陳十餘里翟讓先戰不利
世充逐之王伯當裴仁基從旁橫
斷其後密勒中軍擊之世充大敗

李密誘翟讓殺之

翟讓司馬王儒信勸讓自爲大冢宰總統衆務以奪
密權讓不從讓兄弘曰天子汝當自爲奈何與人汝

不爲者我當爲之讓但大笑不以爲意密聞而惡之讓謂房彥藻曰若前破汝南大得寶貨獨與魏公全不與我魏公我之所立事未可知彥藻懼與鄭顛共說密曰讓貪懷不仁宜早圖之密乃置酒召讓弘與裴仁基郝孝德共坐單雄信等皆立侍房彥藻鄭顛往來檢校密曰今日不須多人密左右皆引去讓左右猶在彥藻白密曰今方爲樂天時甚寒司徒左右請給酒食讓許之乃引讓左右盡出獨密下壯士蔡建德持刀立侍食未進密出良弓與讓習射讓方引滿建德自後斫之并弘信儒皆殺之徐世勳走出門者斫之傷頸王伯當遙訶止之單雄信叩頭請命密釋之左右驚擾莫知所爲密大言曰與君等同起義兵本除暴亂司徒專行貪虐陵辱邵僚今所誅止其一家諸君無預也命扶徐世勳置幕下親爲傳劍讓麾下欲散密使單雄信前往宣慰密尋獨騎入其營歷加撫諭令世勳雄信伯當分領其衆中外遂定讓

殘忍儒信貪縱故死之日所部無哀集覽傳劄傳讀
之者然密之將佐始有自疑之心矣

曰敷劍讀曰瘡此正刀劍質實大家宰官名注見陳
字傳劍以樂敷所傷處也宣帝太建九年麾下

郡名注見漢光武建武十九年
麾下注見漢獻帝建安十四年

李淵立代王侑為皇帝尊帝為太上皇

侑時年
十三

書法書尊帝何見唐兵之不以討賊名也故化及
之弑不書太上皇據李兪書弑主不予唐之

尊之也唐不正名自是綱目書
自為大丞相書追謚皆無隱矣

淵自為大丞相封唐王以建成為唐王世子世民為秦

公元吉為齊公

以武德殿為丞相府改教稱令置丞相府官屬以裴寂為長史劉文靜為司馬何潘仁使李綱入見淵留之以為丞相府司錄專掌選事又以竇威為司錄參軍使定禮儀淵傾府庫以賜勲人國用不足光祿大夫劉世龍獻策以為今義師數萬並在京師樵蘇貴而布帛賤請伐苑中及六街樹為樵以易布帛可得十數萬匹

集覽 樵蘓廣韻樵柴也蘇草也江淮湖從之南楚之間曰蘇自關而西曰草

質實 竇威岐州岐山人幟之子京師注見周顯王二十五年

發明

嗚呼唐室之興庶幾乎正矣乃狃於見聞之故而蹈昔人竊篡之故智實有欲得之心而又立幼君以輔之自為大丞相加殊禮然後取焉曷不於起兵之初傳檄天下聲隋廣弒逆之罪數

其淫虐之惡播告四方與弔民問罪之師豈不名正而言順理直而氣壯哉則其得國也雖不能爲湯武之正然亦庶幾矣惜乎一時君臣不明大義此其創業所以不及漢高也歟然其得國比之於他則固優矣綱目詳而書之其義自見

榮陽郡降李密

河南諸郡盡附李密唯榮陽太守卬王慶梁郡太守楊汪尚爲隋守密以書招慶爲陳利害且曰王之先世家住山東本姓郭氏初非楊族初慶祖父元孫隋母郭氏養於舅於及武元帝從周文帝起兵關中元孫在鄴恐爲高氏所誅冒姓郭氏故**集覽**卬上卬地名云然慶卽以郡降密復姓郭氏名也在河東解縣卬或作**質實**榮陽郡名注見秦莊襄王元年恂音相倫反梁郡注見漢後主延熙十八年

宗鄴縣名注見漢獻帝建安十五年

十二月唐王淵追諡其大父為景王考為元王夫人竇

氏為穆妃○薛舉侵扶風唐王淵遣秦公世民擊敗之

薛舉遣其子仁果寇扶風李弼拒之舉遣使招弼弼乃請降仁果乘其無備襲破之悉并其眾勢益張眾號三十萬謀取長安唐王淵使世民將兵擊之大破之追奔至隴坻而還薛舉大懼問其羣臣曰自古天子有降事乎黃門侍郎褚亮曰趙佗歸漢劉禪仕晉轉禍為福自古有之衛尉卿郝瑗趣進曰陛下失問褚亮之言又何悖也昔漢高祖屢經奔敗蜀先主亟亡妻子卒成大業陛下奈何以一戰不利遽為亡國之計乎舉亦悔之曰聊以此試

集覽

隴坻注見漢光武建武八年趙

佗注見漢高帝十一年劉禪三國漢後帝先降於魏魏禪於晉禪又仕晉並亡亟去吏反頻數也質

實

扶風郡名注見周顯王八年岐長安縣名注見漢惠帝五年

河池太守蕭瑀以郡降唐

唐以瑀爲禮部尚書封宋國公時榆林靈武平涼安定漢陽諸郡相繼皆降於唐質實

河池郡名

注見梁武帝中大通六年南岐宗國注見漢後主延熙十八年榆林郡名注見文帝開皇十九年靈武郡名注見唐元宗天寶十五載平涼郡名注見宋文帝元嘉十年安定郡名注見漢光武建武元年漢陽郡名注見漢獻帝建安二十二年下辨

書法

淵既帝侑則昏隋也書降唐何紀實也淵以名尊侑綱目以時錄故蕭瑀書降唐屈突通

書降唐遣招山南山東書

唐遣遣招河東書唐遣

唐王淵遣李孝恭張道源招慰山南山東諸州下之

孝恭淵之從父兄子也擊破朱祭諸將請盡殺其俘
孝恭曰不可自是以往誰復肯降矣皆釋之於是降

附者三十餘州

屈突通降唐唐遣通招河東通守堯君素不下考異

按提

要無通字

屈突通與劉文靜相持月餘復使桑顯和夜襲文靜
營文靜悉力苦戰顯和敗走通勢益蹙或說通降通
泣曰吾歷事兩主思顧甚厚食人之祿而違其難吾
不爲也每自摩其頸曰要當爲國家受一刀勞勉將

士未嘗不流涕人亦以此懷之及聞長安不守家屬皆爲淵所虜乃留顯和鎮潼關引兵東出將趣洛陽顯和即以城降文静遣寶珍等與顯和追之及於稠桑通結陳自固寶琮遣通子壽往諭之通罵曰此賊何來昔與汝爲父子今與汝爲仇讐命左右射之顯和謂其衆曰今京城已陷汝輩皆關中人去欲何之衆皆釋伏而降通知不免下馬東南再拜號哭曰臣力屈至此非敢負國軍人執送長安淵以爲兵部尚書賜爵蔣公燕秦公長史遣至河東城下招諭克君素君素歛敬不自勝通亦泣下霑衿因謂君素曰事勢如此卿當早降君素曰公爲國大臣主上委公以關中代王付公以社稷柰何負國生降更爲人作說客邪且公所乘馬代王所賜也公何面目乘之哉通曰我力屈耳君素曰我力猶未屈何用多言通慙而退

集覽

稠桑地名在榮陽西稠音儔

質實

一統志云稠桑地名在河南府靈寶縣西二十

里古桃林也春秋時虢公敗戎於桑田即此蔣州名
注見漢獻帝興平二年金陵秦州名注見漢光武建
武元年天水獻欽注同上年洛陽縣名注見周顯
王三年社稷注見新莽天鳳元年堯君素魏郡人

王世充襲李密敗績

東都米斗三千人餓死者什二三王世充軍士有亡
降李密者密問世充軍中何爲軍士曰比見益募兵
再饗將士不知其故密謂裴仁基曰吾幾落奴度中
吾久不出兵世充芻糧將盡求戰不得故募兵饗士
欲乘月晦以襲倉城耳宜速備之乃命郝孝德王伯
當孟讓勒兵分屯城側以待之其夕世充兵果至伯
當遇之不利總管魯儒拒却之伯當收兵擊之斬其
驍將士卒戰溺死者千餘人世充屢戰不勝越王侗
遣使勞之世充訴以兵
少侗以兵七萬益之

唐劉文靜取弘農質實

弘農縣名注見周顯王四十五年陝

書法

淵既相侑則猶隋臣也綱目於隋篇而揭書唐劉文靜名實見矣使唐不立侑於此何議

焉此唐之所以為大綱不正者也

○唐王淵遣使徇巴蜀下之質實

巴蜀二郡名注見楚義帝元年○蕭

銑取豫章林士弘退保餘干質實

豫章郡名注見漢武帝元鼎五年一統志

云餘干縣名本春秋時越之西境為越餘地漢置徐汗縣屬豫章郡吳屬鄱陽郡隋改曰餘干縣屬饒州唐宋

因之元陞為餘干州至本朝初改為縣屬饒州府

戊隋恭帝侑義寧二年恭帝侗皇泰元年唐高祖仁堯
實皇帝李淵武德元年○夏王竇建德五鳳元涼王李

軌安樂元楚王朱粲昌達元年○是歲并楚士弘魏定
楊梁師都秦梁銑凡十二國隋煬帝廣泰帝侑秦魏亡
考異按歲年例曰建國之大者朱注國名蓋號姓名年
號小者朱注國名此年隋恭帝侑義寧恭帝侗王
泰唐高祖神堯皇帝李淵武德及夏涼楚國名總結
是歲凡十二國皆當朱注刊本當白字前後倣此 **春**

正月唐王淵自加殊禮

劔履上殿贊拜不名王既克長安以書喻降郡縣於
是東自商洛南盡巴蜀郡縣長吏盜賊氏羌爭遣子
弟入見請降有司**質實**一統志云商洛山名在西安
復書日以百數府商縣東南九十二里亦名
楚山即秦時
四皓隱處

發明

唐公以兵取天下而亦襲近世篡奪之跡何
也惟其始也名義之不正故其終焉之弊必

至於此書自為大丞相自加殊禮自為相
國唐公雖欲曲為之說何可得也惜哉

魏公密敗隋王世充於洛北

王世充既得東都兵進擊李密於洛北敗之遂屯鞏
北命諸將各造浮橋渡洛橋成者先進前後不一密
帥敢死士乘之溺死數萬人世充僅免諸將皆潰世
充復叔合亡散得萬餘人屯含嘉城密乘勝進據金
墉城擁兵三十萬陳於北邙南逼上春門越王侗使
段達常津拒之達望見密兵盛懼而反走密縱兵乘
之軍潰津死城中乏食於是偃師柏谷河陽河內皆
降於密竇建德等並遣使奉表勸進密曰東都未平
未可**質實**洛北洛水之北注見漢高后三年鞏北鞏
議此**質實**縣之北注見漢王邦四年含嘉城未詳處
所金墉城注見魏元帝咸熙二年偃師縣名注見唐
肅宗至德二年栢谷塢名注見漢武帝建元三年河

陽縣名注見漢帝元更始二年河內縣名注見周赧王五十三年野王勸進法見晉元帝建武元年北邙山名注見漢靈帝中平六年東都注見秦莊襄王元年三川

書法

書隋王世充何始夷隋於列國也自是隋事皆書隋而李密輩皆稱國

唐遣世子建成秦公世民救東都以齊公元吉為太原道行軍元帥○三月隋宇文化及弑其君廣於江都立秦王浩

煬帝至江都荒淫益甚酒色不離口然見天下危亂亦不自安退朝則幅巾短衣徧歷臺閣沒沒頓景唯恐不足常仰視天文謂蕭后曰外間大有人圖儂然且共樂飲耳因引滿沉醉又引鏡自照曰好頭顱誰

當斫之后驚問故帝笑曰貴賤苦樂更迭為之亦復何傷見中原已亂無心北歸欲保江東門下錄事李侗客曰江東卑濕土地險狹內奉萬乘外納三軍民不堪命恐亦將散亂耳御史劾之於是公卿皆阿意言江東之民望幸已久陛下撫而臨之此大禹之事也乃命治丹陽宮將徙都之時江都糧盡從駕驍果多關中人思歸郎將司馬德戡元禮直閣裴虔通等共謀亡去因轉相招引曰夜結約於廣生明論叛計無復畏避宮人聞之言於帝帝怒斬之自是無敢言者郎將趙行樞以告將作少監宇文智及智及大喜曰上雖無道威令尚行卿等亡去徒取死耳今天寶喪隋英雄並起同心叛者已數萬人因行大事此帝王之業也德戡等然之行樞因請以智及元許公化及為主化及聞之變色流汗既而從之德戡等乃悉召驍果諭以所為皆曰唯將軍命乃夜於東城集兵得數萬人舉火與城外相應帝望見大聞外喧蹶問

曰何事度通對曰草坊失火外人共救之耳帝以為然明日未明德戮使度通將數百騎入宮屯衛將軍獨孤盛與左右十餘人拒戰而死千牛獨孤間遠帥殿內數百人叩閣請帝自出臨戰無應者軍士稍散先是帝選驍健宮奴數百人置立武門謂之給使以備非常至是化及等結帝所信司宮魏氏使橋詔聽給使出外德戮遂引兵自立武門入帝聞亂易服逃於西閣度通等入永巷問陛下安在有美人出指之校尉令狐行達拔刀直進扶帝下閣勒兵守之至旦以甲騎迎化及化及戰栗不能言既至德戮等迎謁引入朝堂號為丞相度通通帝出宮化及見之曰何用持此物出取還與手於是引帝還至寢殿度通等露刃侍立帝嘆曰我何罪至此賊黨馬文舉曰陛下違棄宗廟巡遊不息外勤征討內極奢淫使丁壯盡於天刃女弱填於溝壑四民喪業盜賊蜂起專任佞諛飾非拒諫何謂無罪帝曰我實負百姓至於爾輩

榮祿兼極何乃如是今日之事孰為首邪德戡曰溥
天同怨何止一人化及又使封德彝數帝罪帝曰卿
乃士人何為亦爾德彝赧然而退帝愛子趙王杲年
十三在側號慟不已度通斬之血濺御服欲遂弑帝
帝曰天子死自有法何得加以鋒刃取鵠酒來文舉
等不許使令孤行達縊殺之初帝每巡幸常以蜀王
秀自隨化及既弑帝欲迎立之眾議不可乃殺之及
齊王暕宗戚無少長皆死唯秦王浩素與智及往來
且以計全之暕素失愛於帝恒相猜忌帝聞亂謂蕭
后曰得非阿兒邪化及使人誅暕暕謂帝使叔之曰
詔使且緩兒兒不負國家父子至死不相明又殺虞
世基裴蘊來護兒等世基弟世南抱世基號泣請以
身代化及不許化及自稱大丞相總百揆以皇后令
立秦王浩為帝居別宮以兵守之令發詔畫敕而已
以智及裴矩為僕射士及為內史初矩知將有亂難
廝後皆厚遇之又建策為驍果娶婦故免於難化及

至又迎拜於馬首故化及亦以為僕射化及之入朝堂也百官畢賀蘇威亦往給事即許善心獨不至化及殺之其母范氏年九十二撫柩不哭曰吾有子矣不食而卒唐王之入關也張季珣之弟仲瑛為上洛令死之至是仲瑛弟琮為千牛左右亦為化及所殺凡弟皆死國難時人惜之唐王聞變慟哭曰吾北面事人失道不能救敢忘哀乎追謚曰煬

集覽

汲汲顧景汲汲不休息貌又勤急貌顏師古曰汲汲

欲速之義如井汲之為也禮記汲汲然如有追而弗及也樞要云日光曰景日景曰晷左傳趙孟視蔭謂顧視日景也汲汲顧景唯恐日景之云暮大禹之事夏帝禹立十年東巡狩至於會稽司宮加以宮刑而為闕宦之長左傳楚以羊舌肸為司宮亟還與手正亟趣也執帝手而扶出故曰亟還猶言速放手也正誤司宮今按司宮魏氏乃婦人也亟還與手今按謂誤急引還與下手弑之也晉書周筵傳元帝遣筵殺

周續筵叱郿傳教吳曾何不
與手曾以刀環築續殺之
質實 汲汲注見唐德宗
貞元二十一年幅

巾事物紀原云古庶人服巾士則冠矣傅子曰漢末
王公多委士服以幅巾為雅素則幅巾古賤者服也
漢末始為士人之服袁紹戰敗幅巾渡河是也許縣
名注見漢光武建武八年千牛官名注見梁武帝普
通二年永巷宮獄名注見周赧王四十五年戰栗恐
懼貌蜂起注見秦二世二年上洛縣名注見晉元帝

太興
元年

書法 秦嘗夷於列國矣趙高弑帝則書帝廣則昌
為斥名而書其君廣弑逆則賊也與二世又

異矣弑逆之賊而化及君之君而弑
之書曰其君以為化及之所君云耳

發明 或問武王數紂之罪煬皆言之至於弑父殺
凡乃紂之所無者後世以誅獨夫紂為言至

於煬之死也何為反書哉乎曰煬之罪惡固天地之所不容人神之所共怒者至化及等輩則無所負故其責德戡之語以謂我實負百姓而於爾等榮祿皆極何乃如是此徒皆無以應然則煬固化及之君也直書曰弒所以正此曹之罪耳向使是時起兵之衆有能聲其大逆推明寢殿之事奉將天罰執而數之肆諸市朝殘其身潛其宮以正殺無赦之罪則廣必自伏其辜而綱目亦必以獨夫之誅處之矣惟夫舉天下無有能正之者是以書法如此不然是時天下猶廣之天下何以不書曰帝而必書曰其君廣邪變文起義彼固化及之君也嗚呼綱目至是亦有不得已之意焉爾可勝嘆哉

唐王淵自為相國加九錫

隋以唐王為相國總百揆加九錫王謂僚屬曰此論
諛者所為耳孤秉大政而自加寵錫可乎必若循魏
晉之迹彼皆繁文偽飾欺天罔人孤竊耻之或曰歷
代所行亦何可廢王曰堯舜湯武各因其時取與異
道皆推其至誠以應天順人未聞夏商之末必效唐
虞之禪也但改丞相為相國府其九錫殊禮皆歸之
有司范氏曰唐高祖可謂不自欺矣然以兵取而必
曰受禪是未免襲衰世之迹也胡氏曰天道誠聖人
亦誠人非生知安行必勉於思誠思而不息亦能學
知而利行矣湯武之德不及堯舜而列於聖人者由
此其選也故其於桀紂也尚為君則臣之天命殛之
則伐之固不虛為臣之名而實為伐之之事也唐
王惟不正名楊廣為弒父與君之賊而舉師是故節
目繁多詭正並用興王之術駁而不懿也夫殊禮固
不可自加也前日都督丞相唐王之命果出恭帝邪
能言湯武之誠而不悟在己之多偽由不學之過也

集覽

唐王惟不正名楊廣爲弒父與君之賊而舉師

只作一句讀楊廣煬帝也謂唐王不正以煬帝弒父與君之罪爲名而興兵乃集將佐曰劉武周據汾陽宮吾輩罪當族滅又稱臣突厥謂曰欲舉義兵迎主上又詐爲敕書發民爲兵擊高麗又世民以宮人私侍之事劫其父以此多端而舉師故下文曰節目繁多詭質實百揆注見晉元帝元興元年正並用九錫注見漢平帝元始五年

宇文化及發江都

宇文化及擁衆十餘萬據有六宮自奉如煬帝以少主浩付尚書省令衛士守之遣史取其畫敕百官不復朝參下令欲還長安奪人舟楫以行至顯福宮虎賁即將麥孟才等與折衝即將沈光謀曰吾儕受先帝厚恩今挽首事讎何面目視息世間哉吾必欲殺之死無所恨光泣曰是所望於將軍也乃與孟才糾

合恩舊帥所將數千人將以晨襲化及語
洩化及殺之其麾下皆闕死無一降者
集覽 視息 瞻視

喘息也注見晉
武帝咸寧五年質實沈光吳

興人

隋吳興太守沈法興起兵據江表十餘郡

法興閩字文化及弒逆舉兵討之得精卒

六萬攻餘杭毘陵丹陽皆下之據十餘郡質實吳興郡名

注見宋明帝泰始二年沈法興武康人餘杭郡名注

見唐憲宗元和二年毘陵郡名注見煬帝大業十二

年丹陽郡名注見漢

獻帝興平二年金陵

夏四月唐世子建成等還長安

世子建成秦公世民引兵至東都城多欲為內應
者世民曰吾新定關中根本未固雖得東都不能守

也逆不受將還世民又曰城中見吾還必來追躡乃設三伏以待之段達果來追遇伏而敗世民遂置新安宜陽二郡分質實長安縣名注見漢惠帝五年新兵守之而還安郡名注見楚義帝元年宜陽

郡名注見周

安王十一年

宇文化及至彭城魏公密拒之化及引兵入東郡

宇文化及至彭城奪人車牛載宮人珍寶而使軍士自負戈甲道遠疲劇軍士皆怨司馬德戡謂趙行樞曰君大謬誤我當今撥亂必藉英賢化及庸暗羣小在側事將必敗若之何行樞曰在我等耳廢之何難遂與諸將謀殺化及事泄化及執德戡等讓之德戡曰本殺昏主若其淫虐推立足下而又甚之逼於物情不得已也化及殺之并其黨十餘人李密據鞏洛以拒化及化及不得西引兵入東郡通守王軌以城

降質實彭城郡名注見秦始皇二十八年鞏洛鞏縣名注見漢王邦三年洛州名注見秦莊襄王

元年三川東郡注見漢光武建武八年

梁王銑稱皇帝

梁王蕭銑即帝位置百官徙都江陵脩復園廟引岑文本為中書侍郎委以機密又使張繡狗嶺南郡縣多降始安郡丞李襲志散財募士以保郡城群盜攻之皆不能下聞煬帝遇弒帥吏民臨三日或以尉佗之事說之襲志怒曰吾世繼忠貞江都雖覆宗社尚存尉佗狂借何足慕也欲斬說者眾皆不敢言堅守二年外無聲援至是城陷為銑所虜於是東自九江西抵三峽南盡交趾北距漢川銑皆有之勝兵四十餘集覽尉佗注見漢光質實江陵縣名注見漢獻帝建武五年建安十三年岑文本鄧

州棘陽人嶺南謂五嶺之南即南海郡注見秦始皇
三十三年始安郡注同上年桂林李襲志狄道人九
江郡名注見晉明帝太寧二年潯陽三峽注見宋明
帝泰始二年江都縣名注見漢獻帝興平元年交趾
郡名注見唐宣宗大中二年漢
川郡名注見周赧王四年漢中

五月唐王淵稱皇帝

隋恭帝禪位於唐唐王即皇
帝位推五運為土德色尚黃

書法

漢唐皆以兵取天下者也漢高祖書即皇帝
位此其書稱皇帝何唐之兵不以討賊名也
故綱目書自為大丞相封唐王書自加殊禮書自
為相國加九錫書稱皇帝與魏晉以下無異矣

唐罷郡置州以太守為刺史○隋越王侗稱皇帝

東都留守官開煬帝凶問奉越王侗即位段達王世充為納言元文都為內史令共掌朝政侗眉目如畫溫厚仁愛質實納言官名注見漢風格儼然靈帝光和元年

書法昭烈之立也書即皇帝位侗煬嫡孫也煬弒而後即位則書稱皇帝何煬弒父則賊也其子孫豈得與昭烈比哉綱目立書稱皇帝弒書隋主列國之也

突厥遣使如唐

時突厥疆盛東自契丹室西盡吐谷渾高昌諸國皆臣之控弦百餘萬唐初起兵資其兵馬前後餉遺不可勝紀突厥恃功驕倨每遣使集覽突厥注見梁者至長安多暴橫唐主優容之武帝大同十

一年契丹注見晉安帝義熙二年室韋契丹之別部丁零之苗裔地據黃龍北傍徭越河共有七姓室或

作失吐谷渾注見晉元帝建武元年
年高昌注見宋文帝元嘉十九年
質實 控弦注見漢
帝元更始二
年

唐定律令置學校

命裴寂劉文靜等脩律令行之置國子太
學四門生三百餘員郡縣學亦置生員

發明

秦人焚書坑儒至漢始開學校隋人廢黜儒
學至唐始置學校吾道固不以是而隆汙而

漢唐之所以立國者則
有其本矣故特書之

六月唐以秦公世民為尚書令裴寂為右僕射知政事
劉文靜為納言竇威蕭瑀為內史令

唐主侍裴寂特厚群臣莫及日賜御膳言無不從稱
為裴監而不名委蕭瑀以庶政事無大小莫不關字
瑀亦孜孜盡力繩違舉過人皆憚而毀之瑀終不自
理嘗有敕不時宣行唐主責之瑀對曰大業之世內
史宣敕或前後相違有司不知所從今王業經始事
繫安危故臣每受一敕必勤審使與前敕不違始敢
宣行稽緩之愆實由於此唐主曰卿用心如此吾復
何憂唐主每視事自稱名引貴臣同榻而坐劉文靜
諫曰貴賤失位非常久之道唐主曰諸公皆名德舊
齒平生親友夙昔之歡何可忘也胡氏曰裴劉皆非
宰相才一時起事同謀次第至此耳然自二人長短
論之文靜智謀出寂右建義之舉人文靜先言而高
祖待寂特厚者寂之為人宜於高祖而文靜之為人
合於太宗也夫高祖不取磊落奇士而眷眷於私昵
抑比之徒久而不忘故唐室初政無
足觀者人主之職亦論相而止矣

質實

孜孜不倦
磊落注

見晉成帝
咸和七年

唐立四親廟

追尊皇高祖熙曰宣簡公皇曾祖天賜曰懿王皇祖
虎曰景皇帝廟號太祖皇考炳曰元皇帝廟號世祖
妣皆為后諡妃竇氏曰穆皇后每歲祀昊天上帝皇
地祇神州地祇以景帝配感生帝明堂以元帝配

集覽

昊天上帝周禮大宗伯以禋祀祀昊天上帝鄭
司農云昊天上帝也上帝玄天也昊天上帝樂以

雲門鄭玄謂昊天上帝冬至至於圜邱所祀天皇帝
也皇帝祇注見漢後主建興十五年神州地祇神州
注見晉懷帝永嘉五年景帝配唐高祀之祖名虎追
諡景皇帝王者必以其祖同祭於天尊之感生帝
明堂唐禮樂志正月上辛祈穀祀感生帝於南郊李
秋祀五方天帝於明堂春秋元命包曰天之五帝迭

王王者之興必感其一故祀其所感生者如周為木德以青帝為感生也記大傳曰禮不王不禘王者禘其祖之所自出以其祖配之注云凡大祭曰禘自由也大祭其先祖所由生謂郊祀天也王者之先祖皆感太微五帝之精以王蒼則靈威仰赤則赤熛怒黃則含樞紐白則白招拒黑則恊光紀皆用正歲之正月郊祀之蓋特尊焉孝經曰郊祀后稷以配天配靈威仰也宗祀文王於明堂以配上帝汎配五帝也

唐立世子建成為皇太子世民為秦王元吉為齊王考

證立世子當作更世子皇太子當去皇字謹按凡例曰立太子非正統則不書因奉特書者去皇號是年天下凡十二國唐雖稱帝無統之時也特書以備唐事而已故當去皇號後立太宗事已并天下得正統故書皇太子非抑此而尊彼也

宗室封王者八人

發明

觀高祖之得天下大抵出於秦王也使無秦

王高祖且不得安其祿位保其身家况有天下之大哉高祖有言今日破家滅軀亦由汝化家為國亦由汝是則唐三百年之基業肇於秦王其當有天下無疑也高祖於是時蓋召建成明諭以其基業所由興之故非世民無以有今日俾其明自推讓則建成有讓國之美世民無推刃之慚萬一建成不從則斷以大義封之遐阻之地世民若避則贊以至誠察其由衷之言至再至三表裏面背始終無間然後定儲貳之位必至於兩全而後已則父子之道得兄弟之好終君臣之分定而國家安於磐石矣惜乎計不出此厥後骨肉相殘為古今之大惡悲夫

秦主舉侵唐涇州質實

涇州注見漢光武建武元年安定

唐以永安

王孝基爲陝州總管質實

永安縣名注見周赧王三十五年陝州注見周顯王四十五

年

時邊要州皆置總管府以統數州之兵

唐廢隋帝侑爲鄒國公而選用其宗室

詔曰近世以來時運遷革前代親族莫不誅夷興亡之效豈伊人力其隋蔡王智積等子孫並付所司量才選用范氏曰商之孫子侯服於周誅其罪人之身而立其子天下公義也况宗族乎高祖始即位而立隋子孫由漢以來最爲集覽鄆元圭反說文東海之志厚其享國長世宜哉

鄆元圭反說文東海之邑按杜預注紀地也在

齊國東平縣昔紀季以郟入齊今郟亭是侯服于周詩大雅文王篇商之孫子其麗不億上帝既命侯于周服文王集傳曰商之孫子其數不止於億然以上帝之命集於文王而今皆維服於周矣

書法

侑自立爲皇帝每事書唐而已未嘗有帝也此則曷爲以隋帝書罪唐也不宜立而立之

既已立之而又廢之斯唐罪矣故雖夷隋列國而於侑特書帝焉所以正罪唐也曷爲名侑別於侗也然則書選用其宗室何予存厚也自蕭道成弑汝陰王滅其族是後廢主之族無得免者唐於楊氏不惟不忍加害又選用焉可謂厚矣書廢隋帝侑罪之也書選用其宗室予之也故書而以殊之唐事至是始有可書者矣

發明

書廢隋帝爲國公則未免襲近世之跡書選用其宗宗則大非近世之比矣享國久長年

幾三百

宜哉

唐以孫伏伽為治書侍御史

萬年懸法曹孫伏伽上表曰隋以惡聞其過亡天下
故陛下得之然陛下徒知得之之易而未知隋失之
之不難也謂宜易其覆轍務盡下情凡人君言動不
可不慎陛下今日即位而明日有獻鶴雞者此乃少
年之事豈聖主所須哉又百戲散樂亡國淫聲近太
常於民間借婦女裙襦以充妓衣擬五月五日元武
門遊戲此亦非所以爲子孫法也夫善惡之習漸染
易移太子諸王參僚左右宜謹擇其人
有門風不睦素無行義專好奢靡以聲色遊獵爲事者皆不可近
自古骨肉乖離以至敗亡未有不因左右離間而然
也唐主大悅下詔褒稱擢爲治書侍御史賜帛三百
匹仍頒示遠近范氏曰天下之勢如人一身必氣血

周流無壅而後能存諫者使下情上通上意下達如血氣之周流於一身也故言路開則治言路塞則亂高祖鑿隋之所以亡首闢言路可謂知先務矣是以民知上之憂已而疾痛將有所赴愬也唐室之興不亦宜質寶萬年縣注見漢高帝十年孫伏伽貝州人

書法

書美從善也高祖初政即有此書可謂知務矣

唐竇威卒以竇抗陳叔達為納言○魏公密敗宇文文化及於黎陽奉表降隋

東都開宇文文化及西來上下震懼有蓋琮者上疏請說李密與之合勢以拒化及元文都盧楚以為然使琮齎敕書賜密化及引兵北趣黎陽李密將徐世勣先據黎陽畏其軍鋒西保倉城化及渡河保黎陽分

兵圍世勳密壁於清淇與世勳以烽火相應深溝高壘不與戰密與化及隔水而語數之曰卿本匈奴皂隸世受隋恩主上失德不能死諫反行弑逆天地所不容將欲何之化及默然良久大言曰語爾論相殺事何須作書語邪乃盛修攻具以逼倉城世勳擊敗之密畏東都議其後見蓋琮至大喜遂上表乞降請滅化及以贖罪隋主引見其使冊拜密太尉尚書令封魏公侯平化及入朝輔政元文都等喜於和解於上東門置酒作樂王世充作色曰朝廷官爵乃以與賊其志欲何爲邪文都等亦疑世充欲以城應化及由是有隙七月李密悉以精兵東擊化及化及食盡入汲郡求軍糧又遣使拷掠東郡吏民以責米粟王執等不堪其弊詣密請降化及大懼引餘衆二萬北趣魏縣密知其無能爲西還鞏洛留徐世勳以備之蘇威在東都亦詣密降密虛心禮之威初不言帝室艱難惟再三舞蹈稱不圖今日復覩聖明時人鄙之

集覽

蓋琮蓋姓也音古盍反皂隸皂昨早反左傳人有十等王臣公公臣大夫大夫臣士士臣皂皂

臣與與臣隸隸臣僚僚臣僕僕臣臺

質實

黎陽縣名注見漢成帝綏和三年清淇疑是水名未詳處

所烽火注見齊高帝建元四年魏縣注見漢成帝綏和二年東郡注見恭帝侗皇泰二年汲郡注見秦莊

三年襄王

發明

世或謂密似項羽先儒固已辨之矣羽雖剽悍禍賊然志在滅秦無復回貳密起兵不為

不久乃與東都迭為勝負其非羽比甚明且密前此移檄州郡數煬十罪至是乃反欲降隋何哉綱目前書攻東都此書上表降隋密進退無所據矣其敗宜也

秋七月唐秦王世民與秦主舉戰於高墪敗績

薛舉進逼高塘秦王深溝高壘不與戰會得瘧疾委
軍政於長史劉文靜且戒之曰薛舉懸軍深入食少
兵疲若來挑戰慎勿應也俟吾疾愈為君等破之文
靜欲耀武以威之乃陳於高塘西南恃眾而不設備
舉潛師掩其後上卒什死五六大將劉弘基等皆
沒世民引還長安舉遂拔高塘文靜等皆坐除名

覽高塘城名在今大都路霸州保定縣是塘之石反 **正誤**高塘今按高塘地

與保定縣相去甚遠保定縣乃 **質實**挑戰注見漢
燕南之地時為竇建德所據 **王邦四年**

書法戰而敗者文靜也書世民何已為元帥而以
疾自諉喪師失地罪誰執哉直書世民與戰

敗績其示為人臣
子之義著明矣

隋王世克殺元文都隋主以世克為僕射魏公密如東

都不至而復

李密每戰勝輒使告捷於隋隋人皆喜世充獨曰文都輩刀筆吏耳吾觀其勢必爲李密所擒且吾軍士屢與密戰殺其父兄子弟前後已多一旦爲之下吾屬無類矣欲以激怒其衆文都懼謀因世充朝伏甲謀之段達以告世充世充夜勒兵襲含嘉門文都入奉隋主御殿閉門拒守世充攻太陽門得入殺盧楚隋主使人問世充稱兵何爲世充下馬謝曰元文都盧楚橫見規圖請殺文都甘從刑典段達令人執送文都隋主慟哭遣之世充殺之及其諸子段達開門納世充世充悉遣人代宿衛者然後入見謝曰文都等欲召李密以危社稷疾臣違異深積猜嫌迫於救死不暇聞奏被髮爲誓詞淚俱發隋主以爲誠以世充爲左僕射總督內外諸軍事世充移居尚書省使兄世暉入居禁中子弟咸典兵馬隋主拱手而已密

將入朝至溫聞變而還初密獲東都國子祭酒徐文遠以故嘗受業備弟子禮比面拜之文遠曰將軍之志欲爲伊霍以繼絕扶傾則老夫雖遲暮猶願盡力若爲莽卓來危邀利則無所用老夫矣密頓首曰願竭庸虛康濟國難此密之素志也文遠曰將軍名臣之子失塗至此若不遠而復猶不失爲忠義之臣密頓首受教至是密復問計文遠曰世充亦門人也其人殘忍必有異圖將軍前計爲不諧矣非破世充不可入

集覽

溫注見周報

質實

社稷注見新莽天鳳元年禁中注見宋孝武帝

大明六年伊霍謂伊尹霍光莽卓謂王莽董卓

唐詔廢隋離宮質實

離宮注見煬帝大業元年

書法

前書置離宮此書廢離宮十四年
一置一廢世主亦可以鑒矣

○長樂王建德定都樂壽

初隋河間郡丞王琮守郡城建德攻之歲餘不下琮
開場帝凶問帥吏民發喪建德遣使弔之琮乃降建
德退舍待之琮言及隋亡俯伏流涕建德亦為之泣
諸將請烹之建德曰琮忠臣也吾方賞之以勸事君
奈何殺之往在高鷄泊為盜容可妄殺人今欲安百
姓定天下豈得害忠良乎以琮為瀛州刺史於是河
北郡縣聞之爭附於建德先是建德陷景城執戶曹
張玄素將殺之縣民千餘號泣請代其死曰戶曹清
慎無比殺之何以勸善建德釋之以為治書侍御史
固辭及聞江都敗以為黃門侍郎玄素乃起饒陽令
宗正本博學有才氣說建德以定河北之
策建德引為謀主定都樂壽備置百官
集覽瀛州
高貢
冀州之域秦置邯鄲郡漢為河間郡隋唐為瀛州宋
陞河間府境內有瀛山高數百丈景城唐改滄州今

屬河間府饒陽注見漢帝元更始二年樂壽漢樂壽
縣武帝封河間獻王之子禮為樂壽侯即此今獻州

理樂壽縣屬河間府府
城南六十里有樂壽巖**質實**河間郡注見漢帝元更始二年一統志云高雞

泊在大名府界唐中和中宰相王鐸出為義昌節度
使大名樂彥貞子從訓利其表馬妾侍伏兵於高雞

洎叔驛及家屬吏佐三百餘人皆遇害時朝廷徵弱
不能治其寃即此瀛州注見漢帝元更始二年河間

等城漢文縣名屬渤海郡東漢省後魏徙咸平縣治
此隋改曰景城縣屬瀛州唐屬滄州後省之故城在

河間府獻縣界張元素蒲州虞鄉人
樂壽縣名注見恭帝侗皇泰元年

御批資治通鑑綱目卷三十七下